

T 3149 / 372.33

9

CHINESE - JAPANESE LIBRARY OF  
HARVARD - YENCHING INSTITUTE  
AT HARVARD UNIVERSITY  
MAY 7 1958

大同府志

大同府志缺頁表

卷二十四 第二十一頁

大同府志卷之一十七

大同府知府吳輔宏纂輯

宦蹟 上

昔班史序循吏傳謂所居民富所去民思庶幾德讓君子遺風范史亦言仁信篤誠使人不欺我

國家澄敘官方又安億兆重農桑慎刑獄廣教化既責成守令而大吏復申三載考績之典以黜陟之百餘年來甘棠之愛民不能忘者古今一轍也是以遠稽史傳近覽志乘旁採謠頌殊聞顯迹並綴集一編以為後之守土者式志宦蹟

哈佛大學漢和圖書館珍藏印

周

趙固為代相武靈王十八年秦武王卒王使固迎秦公子稷於燕送歸立為秦王是為昭王

李伯齊人趙孝成悅之以為代郡守人告伯反孝成王方饋不墮食告者復至王不應已而伯使言齊舉兵擊燕恐其擊燕為名而以兵襲趙故發兵自備今燕齊已合臣請要其敝而地可多割自是從事於外者始不自疑於中

李牧趙良將常居代鴈門以便宜置吏市租皆輸入莫府為士卒費日擊數牛饗士習騎射謹烽火多問謀厚遇

戰士約曰燧烟告急亟入收保如是數歲亦不亡失然皆以牧為怯趙王怒召之使他人代將歲餘不利復請牧牧曰王必用臣臣如前乃敢奉令王許之牧至如故數歲士卒皆願一戰於是選車得千三百乘選騎得萬三匹百金之士五萬人設者十萬人為奇陳張左右翼擊之枹鼓大捷後十餘歲戍堠無警

秦

蒙恬其先齊人自祖父世為秦將恬為內史秦既并天下乃使恬將三十萬眾居代攻河南築長城因地形用制險塞延袤萬餘里暴師於外十餘年

漢

孟舒嘗事趙王張敖高帝八年貫高等謀發詔捕敖羣臣有敢隨趙王罪三族惟田叔孟舒等十餘人赭衣自髡鉗隨敖至長安敖事白得出進言叔等十人上召見與語廷臣無能出其右上悅盡拜爲郡守諸侯相舒爲雲中守孝文帝初立召漢中守田叔問曰公知天下長者乎叔頓首曰故雲中守孟舒長者也是時舒免上曰先帝置舒雲中十餘年矣無故士卒戰死者數百人長者固殺人乎叔叩頭曰夫貫高等謀發下詔趙有敢隨王者罪三族然孟舒自髡鉗隨王以身死之豈自知

雲中守哉漢與楚相距士卒罷敝孟舒知士卒罷敝不忍出言士爭臨城効死如子爲父以故死者數百人孟舒豈毆之哉是乃孟舒所以爲長者於是上曰賢哉孟舒復召以爲雲中守

魏尙槐里人爲雲中守其軍市租盡以饗士卒出私養錢五日一椎牛饗賓客軍吏士卒効命威鎮疆圉嘗坐上功首差六級削官後文帝以馮唐言令唐持節赦尙復爲雲中守

周勃沛人以將軍從高帝擊韓王信於代還攻樓煩二城因擊平城下遷太尉擊陳豨得豨將宋最鴈門守圉因

轉攻得雲中守遼丞相箕肆將軍博定鴈門郡十七縣  
雲中郡十二縣因復擊豨靈邱破之定代郡九縣後平  
諸呂亂迎立代王文帝即位以勃為右丞相以下五人雖未官斯

士而皆有戰功省志列之寓賢非是故仍從舊志後皆倣此例

樊噲沛人以將軍從攻韓王信於代至雲中與絳侯勃等  
共定之因擊破陳豨遷左丞相復破豨別將王黃軍代  
南斬信獲代丞相馮梁守孫奮大將王黃等遂定代鄉  
邑七十三

陳平陽武戶牖鄉人也高帝七年從擊韓王信於代至平  
城高帝被圍七日不得食用平奇計圍以得開高帝既

出其計祕世莫得聞

酈商高陽人定上谷攻代受趙相國印與絳侯等定代郡  
鴈門得代丞相程縱守相郭同將軍以下至六百石十

九人

夏侯嬰沛人從高帝擊代至武泉雲中擊韓信至平城被  
圍帝使厚遺之乃開其圍一角帝出欲馳嬰固徐行弩  
皆持滿外鄉卒以得脫後擊句注北破之又擊之平城

南三陷陣功為多

傅寬以魏五大夫騎將從為舍人積功為齊相國高帝七  
年四月擊陳豨屬太尉勃以相國代丞相噲擊豨一月

徙爲代相國將屯時代國常有屯兵寬爲代相兼將屯兵也

張蒼陽武人也好書律歷秦時爲御史入漢爲常山守從韓信擊趙蒼得陳餘趙地平以蒼爲代相復以從攻臧荼有功封北平侯

李廣隴西成紀人世世受射景帝時爲鴈門雲中太守武帝卽位左右言廣名將也入爲未央衛尉後爲驍騎將軍屬護軍將軍軍馬邑烽烟無警後四歲以衛尉爲將軍出鴈門塞北兵多破廣軍以廣賢素聞塞北令曰得李廣必生致之得廣廣時傷置兩馬間絡而盛之臥行

十餘里廣陽死覘其旁一兒騎善馬暫騰而上南馳得脫至漢下廣吏贖爲庶人元朔六年復爲將軍從大將軍出定襄歷七郡太守前後四十餘年得賞賜輒分其戲下飲食與士卒共之士以此愛樂爲用家無餘財終不言生產事爲人長猿臂其善射亦天性雖子孫他人學者莫能及塞北嘗號曰飛將軍

衛青字仲卿河東平陽人也元光六年拜車騎將軍出上谷賜爵關內侯其秋復將三萬騎出鴈門明年出雲中西至高闕以功封長平侯元朔五年令青將三萬騎出高闕有功天子使使持大將軍印卽軍中拜青爲大將

大同府志 卷之二十七  
軍益封八千七百戶

霍去病大將軍青姊子也善騎射以功封冠軍侯元狩三年為票騎將軍四年春上令去病將五萬騎出定襄尋令青出定襄去病出代郡去病功多於青既還大將軍票騎將軍皆為大司馬而去病日益貴上嘗欲教之孫吳兵法對曰顧方畧何如耳不至學古兵法由是益愛重之

趙充國字翁孫隴西上邽人也沈勇有大畧少好將帥之節而學兵法本始中為後將軍將四萬騎分屯雲中代鴈門定襄五原朔方上谷漁陽等緣邊諸郡邊境帖然

辛慶忌字子真荻道人少以父任所在著名成帝時執金吾左遷雲中太守徵為光祿勳仕至左將軍質行正直仁勇得衆心通於兵事咸服其威信焉

邳都河東大陽人為入勇有氣公廉不發私書問遺無所受請寄無所聽由濟南守遷中尉以事免景帝使使就

家拜都為鴈門太守便道之官便宜從事

按都見漢書酷吏傳雖號

為蒼鷹然公廉行法不避貴戚為人所憚中視定襄太守義縱一日報殺四百餘人固自有間故去彼而存此

班伯樓煩人為奉車都尉志節慷慨會定襄大姓石季羣輩報怨殺追捕吏伯自請試守期月上即拜伯為定襄太守定襄聞伯素貴年少自請治劇畏其下車作威吏

民竦息伯至請問耆老父祖故人有舊恩者迎延滿堂  
 日為供具執子孫禮郡中益弛諸所賓禮皆名豪懷恩  
 班醉酒共諫伯宜頗攝錄盜賊具言本謀亡匿處廼召屬  
 縣長吏選精進掾史分部收捕及它隱伏旬日盡得郡  
 中震慄咸稱神明

馮參上黨潞人為入務嚴初為涇陵令徙為郎永始二年  
 遷代郡太守民甚德之

劉興為代郡太守建武六年擊盧芳將賈覽於高柳戰歿  
 鄧鴻南陽新野人禹少子好籌策永平中以為小侯引入  
 與議事帝以為能拜將兵長史率五營士屯鴈門肅宗

時為度遼將軍

耿舒扶風茂陵人况子弁弟更始徵代郡太守趙永况勸

永不應召令詣光武光武遣永復郡而代令張孺據城

拒永光武以舒為復武將軍使擊孺破之後封牟平侯

耿夔字止公少有氣決歷任五原遼東太守永初三年左

轉雲中太守後遷行度遼將軍事以罪免建光中復拜

度遼將軍

耿孺字季遇順帝初為烏桓校尉率諸郡卒出塞威振北

王方遷度遼將軍

馬援字文淵扶風人拜伏波將軍建武二十五年將二千



騎出高柳行鴈門代郡上谷障塞

王霸字元伯潁川潁陽人建武初拜偏將軍九年與吳漢等四將軍五萬餘人擊盧芳將賈覽閔堪於高柳拜上谷太守領屯兵如故明年復與四將軍六萬人出高柳擊賈覽霸將兵為諸軍鋒左南將軍數千騎救覽霸等連戰於平城下破之還入鴈門與驃騎大將軍杜茂會攻盧芳將尹由於崞不克十三年詔霸將弛刑徒六千餘人與杜茂治飛狐道堆石布土築起亭障自代至平城三百餘里

郭涼字公文右北平人也身長八尺氣力壯猛雖武將通經書多智畧建武九年為鴈門太守與杜茂擊盧芳將尹由於繁峙鴈門人賈丹霍匡解勝等為尹由所畧由以為將帥與守平城十二年賈丹等聞盧芳敗遂共殺由詣涼涼上狀皆封為列侯自是盧芳城邑稍稍來降涼誅其豪右郇氏之屬鎮撫羸弱旬月間鴈門平趙熹字伯陽南陽宛人建武二十七年拜太尉撫綏有方幽并二州由是而定

蘇竟字伯况扶風平陵人平帝世以明易為博士講書祭酒善圖緯能通百家言王莽時為代郡中尉光武即位拜代郡太守建武五年冬盧芳畧得諸郡帝使偏將軍

隨弟屯代郡竟病篤以兵屬弟詣京師拜侍中

廉范字叔度京兆杜陵人趙將廉頗之後也世為邊郡守

范舉茂才遷雲中太守會邊烽日亟吏欲傳檄求救范

不聽自率士卒拒之眾寡不敵會日暮令軍各交縛兩

炬三頭爇火營中星列見者謂救兵至待旦將退范乃

令軍中蓐食晨往赴之大捷由此邊疆乃謐後頻歷郡

守所至有聲

李膺字元禮潁川襄城人初舉孝廉歷任刺史太守轉烏

桓校尉以公事免永壽二年雲中告急桓帝聞膺能徵

為度遼將軍一郡寧謐振遠域同郡杜密字周甫為

人沈質少有厲俗志為司徒胡廣所辟遷代郡太守與

膺名行相次故時人稱李杜焉

成嚴為雲中太守建光元年邊烽警嚴擊之兵敗功曹楊

穆以身捍嚴俱力戰歿

李超為代郡太守順帝永建元年秋死於軍事

曹彰字子文魏武子少善射御膂力過人數從征伐不避

艱險建安二十二年代郡烏桓離去彰為北中郎將行

驍騎將軍北征身自搏戰矢發應弦而倒乘勝逐北至

於桑乾去代二百餘里長史諸將皆以為新涉遠士馬

疲頓又受節度不得過代不可深進彰曰率師而行惟

利所在何節度乎遂上馬令軍中後出者斬一日夜乃相及大破之

魏

裴潛字文行河東聞喜人太祖定荊州以潛參丞相軍事歷三縣令倉曹屬代郡未寧以潛爲代郡太守潛至案誅郡中大吏相表裏者十餘人百姓歸心軍威大震在代三年還爲丞相理曹掾

田豫字國讓漁陽雍奴人鄆陵侯彰征代郡以豫爲相軍次易北伏騎擊之軍人擾亂豫因地形回車結圍陣弓弩持滿於內疑兵塞其隙遂大破之乃平代文帝初使

豫持節護烏丸校尉在治九年摧抑兼并乘散強凌邊疆晏然威震沙漠正始末拜大中大夫

牽招字子經安平觀津人太祖舉爲茂才文帝時拜右中郎將出爲鴈門太守郡在邊陲雖有候望之備而邊警不斷招旣教民戰陣又表復烏丸五百餘家租調使備鞍馬遠遣偵候吏民膽氣日銳荒野無虞復繕治陁北故上館城置屯戍以鎮內外於是野居晏蔽烽警靜息乃簡選有才識者詣太學受業還相授教數年中庠序大興明帝卽位賜爵關內侯

晉

大司馬

官蹟

辟閭嵩幽州刺史段匹磾所署代郡太守也并州刺史劉  
 琨忠於王室素有重望為匹磾拘留經月遠近憤歎嵩  
 與琨所署鴈門太守王據等連謀密作攻具欲以襲匹  
 磾事泄嵩及據皆被害

元魏

元繼字世仁襲封江陽王孝文時累遷都督柔元撫冥懷  
 荒三鎮諸軍事鎮北將軍高車擁部民攻邊境詔繼都  
 督北討諸軍事自懷朔以東悉稟節度繼表請遣使推  
 檢誅讐首一人餘加慰諭於是其徒往往歸順帝善之  
 曰江陽良足大任也車駕北巡至鄴而高車悉降恒朔

清定世宗時官恒州刺史

按魏書諸王列傳繼曾任青州刺史歲饑為家僮取民女

為婦妾又以良人為婢為御史所彈其人固非純善但其在恒朔則有功績故節錄之他倣此

元深字智遠襲父廣陽王爵孝明時沃野鎮人破六韓拔

陵叛詔深為北道大都督受尚書李崇節度深上書求

改鎮為州以順人望不納後朝廷思深言時六鎮盡叛

不得施行深復表請簡兵畱守恒州要處李崇還深專

總戎政拔陵南逼別將李叔仁請援遂赴之前後降附

二十萬人深與行臺元纂表求恒州以北別立郡縣安

置降戶隨宜賑賚詔不從分散於冀定瀛三州深謂纂

曰烽警由此作矣既而果如其言

元澄字道鎮任城王雲之子恭宗之孫也襲父封孝文遷  
都洛陽恒州刺史穆泰謀不軌推朔州刺史陽平王顥  
爲主顥表其狀帝召澄入見曰此事非任城不辦如其  
弱也直往擒剪彊可承制發并肆兵以殄之遂授節銅  
虎竹使符御仗左右仍行恒州事行達鴈門太守夜告  
泰已握衆西就陽平城下聚結唯見弓仗澄聞便速進  
右丞孟斌曰事不可量須依勅召并肆兵然後徐動澄  
曰泰旣構逆應據堅城而更迎陽平度其所爲似當勢  
弱泰旣不相拒無故發兵非宜也但速往鎮之民心自  
定遂倍道兼行出其不意遣治書侍御史李煥先赴至

卽擒泰民情怡然窮其黨與罪人皆得具狀表聞帝大  
悅車駕巡幸平城引見無一稱任時人莫不歎美

元休景穆子元興二年封安定王孝文時出爲使持節征  
北大將軍撫冥鎮大將蠕蠕入塞休身先將士擊走之  
元羽字叔翻獻文子太和九年封廣陵王孝文將南討遣  
羽持節安撫六鎮車駕旣發詔羽與太尉丕留守京師  
並加使持節遷京之後羽鎮撫代京內外肅然以留守  
功增邑五百戶

安原遼東人雅性矜嚴沉勇多智畧明元時爲獵郎出監  
雲中軍事以驍勇任爲將鎮守雲中寬和愛下甚得衆

心以功賜爵武原侯

來大千代人驍果善騎射累遷征北大將軍鎮雲中兼統

白道軍事太武以其壯勇數有戰功兼悉北境險要詔

巡撫六鎮以防不虞經畧布置甚得事宜

按大千以代人鎮雲中故

人物宦蹟兩見特文有詳畧耳他皆倣此

司馬楚之字德秀晉宣帝弟太常馗之八世孫太武初歸

國封瑯琊王車駕伐蠕蠕詔與濟陰公盧中山等督運

以繼大軍時鎮北將軍封沓亡入蠕蠕說令擊楚之等

以絕糧運乃遣奸覘入楚之軍截驢耳而去有告失驢

耳者諸將莫能察楚之曰必覘人截之以為驗耳兵將

至矣即使軍人伐柳為城水灌之令凍城立而兵至冰

峻城固不可攻逼乃走散尋拜雲中鎮大將朔州刺史

在邊二十餘年以清儉著聞

司馬躍字寶龍楚之次子拜駙馬都尉代兄金龍為雲中

鎮將躍請罷河西苑封與民墾殖有司執奏此麋鹿所

聚大官取給今若與民至於奉獻時禽懼有所闕躍固

請與民孝文從之楚之父子相繼鎮雲中朔土服其威

德

陸侯代人太武時為懷荒鎮大將未替諸高車莫弗訖訟

侯嚴急還請前鎮將郎孤詔許之徵侯還京既至朝見

言於太武曰陛下今以即孤復鎮不過周年孤身必敗  
高車必入帝疑謂不實切責之明年諸莫弗果殺孤而  
入帝大驚卽召侯問其故侯曰夫高車強盛難爲其上  
所以蒞之以威嚴節之以憲綱欲漸加訓導使知分限  
而惡直醜正訟臣無恩孤獲還鎮欣其名譽專欲以寬  
惠仁恕加於百姓強盛之人易生陵傲無復上下然後  
收之以威則人懷怨懟敗亂彰矣帝笑曰卿身雖短慮  
何長也卽日除爲散騎常侍

源懷河西王禿髮儁之孫父賀來歸賜姓源氏懷謙恭  
寬雅有大度太和中授馮翊郡公詔使持節加侍中行

臺巡行北邊六鎮恒燕朔三州賑給貧乏兼採風俗考  
論殿最事之得失皆先決後聞自京師遷洛邊朔遙遠  
加連年旱儉百姓困敝懷衞命巡撫存恤有方便宜運  
轉有無通濟懷上言北方連年災旱高原陸野不任營  
殖惟水田少可菑畝悉爲主將參僚專擅百姓困敝日  
甚請依地令分給貧民又以北鎮事勢實少畿服往日  
置官全不差別沃野一鎮自將以下八百餘人黎庶怨  
嗟請諸帥吏佐五分減二詔皆從之時細民爲豪強陵  
壓積年在滯一朝見申者日有百數所上事宜便於北  
邊者凡四十餘條皆見嘉納正始元年蠕蠕二十萬騎

南入恒代詔懷以本官加使持節侍中出據北方諸所處分皆以便宜從事懷至雲中蠕蠕去乃旋至恒代案視諸鎮左右要害之地可以築城置戍之處皆量其高下揣其厚薄及儲糧積伏之宜犬牙相制之勢表上五十八條自魏歷齊北鎮諸戍東西九城是也及卒府寺議諡靖諡穆詔曰府寺所執並不克允愛民好與曰惠可諡惠公

楊播字延慶恒農華陰人太和中進北部給事中詔巡行北邊戒以軍畧與陽平王頤等出漠北擊蠕蠕大獲而還累遷武衛將軍太府卿景明初兼侍中使恒州贍恤

寒乏轉安北將軍播族弟鈞爲恒州刺史以彊濟稱

李崇字繼長頓丘人孝武時爲尚書令器識英敏北鎮破六汗拔陵叛安北將軍李叔仁敗於白道詔崇以本官加使持節開府北討大都督崇至五原別將崔暹軍敗遂并力攻崇崇與廣陵王淵力戰累破之相持至冬乃引還平城

李龍瓌冀州人以勇壯爲將統正光中北征戰死白道

高植勃海裔人白中書侍郎歷恒州刺史以清能著稱當

時號爲良刺史

段進太武初爲白道守將蠕蠕大檀入塞圍之力屈被執



進抗聲大罵遂為所害追贈安北將軍  
 張赦提中山安喜人性雄武有規畫初為虎賁中郎時京  
 師盜魁自稱豹子虎子並善弓馬連及諸畜牧者各為  
 部帥於靈邱鴈門閒聚為劫害軍騎掩捕久弗獲行者  
 患焉赦提設防遏追窮之計宰司善之以為逐賊軍將  
 乃求驍勇追之未幾而獲虎子豹子及其黨與盡送京  
 師由是清靜  
 高市貴善無人少有武用孝昌初恒州劉倫等聚眾反市  
 貴為都督率眾討倫一戰破之

北齊

高叡小名須拔趙郡王琛子襲爵容儀甚偉閑習吏職天  
 保六年監築長城於時盛夏六月叡在途中屏除蓋扇  
 與軍人同勞苦遐邇感悅先是役徒罷作丁壯先歸羸  
 弱棄在山北加以饑病多致僵殞叡親帥所部與俱還  
 配合州鄉部分管伍令疆弱相持分有餘贍不足賴以  
 全者十三四焉八年都督北恒北蔚諸州軍事撫慰新  
 遷量置烽戍內防外禦備有條法大為兵民所安有無  
 水之處禱而掘井鑿鉗裁下泉源湧出後人號曰趙郡  
 王泉

斛律金字阿六敦朔州勅勒部人性敦直善騎射天保初

大同府志 卷之七  
封咸陽王蠕蠕爲邊人所破慮其犯塞詔金率騎二萬屯白道以備之以戰功傳

元景安魏昭成五世孫沉敏有幹局天保中累遷武衛大將軍七兵尚書時初築長城鎮戍未立詔景安於諸軍緣塞以備守督領旣多且所部軍人富於財物同行諸人贓汗狼籍惟景安纖毫無犯帝深嘉歎乃詔有司以絹五百疋賜之以彰清節

北周

于翼字文若燕公謹之子大象初拜大司徒詔巡長城立亭障西自鴈門東至碣石創新改舊咸得其要害仍除

幽定七州六鎮諸軍事先是烽警屢告居民失業翼素有威武兼明斥堠自是百姓安之

隋

源雄字世畧西平樂都人仕周開府封朔方郡公隋開皇初進位上大將軍拜徐州刺史數歲遷朔州總管深爲朔方所憚伐陳之役文帝下冊書曰惟爾上大將軍朔方公雄識悟明允風神果毅徃牧徐方時逢未靖建旗馬邑安撫北方嘉謀絕境外之虞肅紀重闡中之望沙漠以北俱荷威恩呂梁之間罔不懷惠但江淮蕞爾有陳僭竊今將董率師旅清彼東南是用命爾爲行軍總

管徃欽哉及陳平以功進上柱國復鎮朔州二歲表乞骸骨徵還京師

楊爽字師仁文帝異母弟也隋受禪立爲衛王會北征以爽爲行軍元帥率李元節等四將出朔州遇沙鉢畧於白道接戰大破之沙鉢畧中重創而去

楊素字處道宏農華陰人仁壽初代高頴爲尚書左僕射其年以素爲行軍元帥出雲中累捷嘗追躡至夜而及之將復戰恐致越逸令其騎稍後親將兩騎並降者二人與之並行不之覺也候其頓舍未定趣後騎掩擊之大破

長孫晟字季晟河南洛陽人性通敏畧涉書記善彈工射趨捷過人以功累授左勳衛驃騎將軍開皇十九年造晟領五萬人於朔州築大利城以處歸誠者晟奏言歸者旣衆雖在長城之內猶被雍虞閭侵襲不得寧居請徙五原以河爲固掘爲橫塹令處其內人必自安上從之明年復還大利城安撫新附終右驍衛將軍

韓僧壽字元慶河南東垣人擒虎母弟亦以勇烈知名開皇中累遷蔚州刺史封廣陵郡公尋以行軍總管後坐事免數載復拜蔚州刺史人士憚之

韓洪字叔明擒虎季弟少善射膂力過人平陳之役以功

加柱國歷蔣廉二州刺史以洪驍勇檢校朔州總管事  
尋拜代州總管

賀婁子幹代人徙居關右隋開皇中拜雲州刺史甚著威  
望後數年雍虞閭遣使請降并進羊馬詔為行軍總管

出西北道應接之還拜雲州總管以所進馬百匹羊千  
口賜之下書曰自公守北門風塵不警所進還以賜公

母憂去

李充隴西成紀人慷慨有英畧開皇中頻以行軍總管有  
功至上柱國拜朔州總管甚有威名

杜彥雲中人性勇果善騎射開皇初累遷左武衛將軍洪  
州總管會雲州總管賀婁子幹卒上悼惜久之謂侍臣

曰榆林國之重鎮安得子幹之輩乎後數日上曰吾思  
可以鎮榆林者莫過杜彥於是徵拜雲州總管威振北

方十八年拜朔州總管尋復拜雲州總管未幾以疾徵  
還

于仲文字次武周燕國公實之子隨開皇初拜行軍元帥  
統十二總管出師服遠鎮人見仲文軍容齊肅不戰而

退後復令率兵屯馬邑

郭衍字彥文太原介休人開皇五年為瀛州刺史甚有惠  
政遷授朔州總管所部恒安鎮北接邊境常勞轉運衍

乃選沃饒地置屯田歲剩粟萬餘石民免轉輸之勞又  
裴肅字神封河東聞喜人剛正有局度開皇中由膳部侍  
郎遷朔州總管長史治有能名  
楊義臣代人性謹厚能馳射有將領才文帝甚重之以行  
軍總管率步騎三萬出白道屢著邊績仁壽初拜朔州  
總管賜御甲四年喬鍾葵圍代州詔義臣救之義臣率  
馬步二萬夜出西陁遲明行數十里鍾葵悉眾來拒義  
臣自以兵少悉取軍中牛驢得數千頭復令兵數百人  
人持一鼓潛驅之澗谷間出其不意晡後復與鍾葵戰

兵初合命驅牛驢者疾進一時鳴鼓塵埃張天鍾葵軍  
不知以爲伏兵發因而大潰縱擊破之以功進位上大

將軍  
斛斯萬善河南人驍勇果毅與馮翊王辯齊名大業中拜  
武賁郎將出鴈門奮擊有功所向變易每戰獨出當其  
鋒或下馬坐地引強弓射之發無不中由是邊境晏然  
萬善之力也其後累遷至將軍

周法尚字德邁汝南安成人少果勁有風槩好讀兵書大  
業初爲雲州刺史轉定襄太守煬帝幸榆林法尚朝於  
行宮內史令元壽言於帝曰漢武出塞旌旗千里今御

營之外請分爲二十四軍日別遣一軍發相去三十里  
旗幟相望鉦鼓相聞首尾連注千里不絕此亦出師之  
盛者也法尚曰不然兵亘千里動問山川卒有不虞四  
分五裂腹心有事首尾未知道阻且長難以取救雖是  
故事乃取敗之道也帝不懌曰卿意以爲如何法尚曰  
結爲方陣四面外距六宮及百官家口並住其間若有  
變起當頭分抗內引奇兵出外奮擊車爲壁壘重設鉤  
陳此與據城理亦何異若戰而捷抽騎追奔或戰不利  
屯營自守臣謂牢固萬全之策也帝曰善因拜左武衛  
將軍

李景字道興天水休官人容貌奇偉驍勇善射開皇中位

上開府詔送義成公主至恒安禦變制勝報績疆場仁

壽中檢校代州總管漢王諒叛并州景發兵拒之諒遣

劉嵩襲景戰於城東升樓射之無不應弦而倒斬獲畧

盡諒復遣嵐州刺史喬鍾葵率勁勇三萬攻之景戰士

不過數千加以城池不固繼以衝擊崩毀相仍景且戰

且築士卒皆殊死鬪司馬馮孝慈司法參軍呂玉並驍

勇善戰儀同三司侯莫陳又多謀畫工拒守之術景知

將士可用推誠二人時出撫循而已月餘朔州總管楊

義臣以兵來援合擊大破之城賴以全

王仁恭字元實天水上邽人少剛毅修謹工騎射頻立戰功累遷至光祿大夫以事免邊烽告警煬帝以仁恭宿將詔復本官領馬邑太守其年始畢率騎數萬來攻馬邑時郡兵不滿三千仁恭簡精銳逆擊破之復入定襄仁恭率兵四千掩擊大獲而歸後為麾下校尉劉武周所害

吐萬緒字長緒代郡人開皇初拜青州總管頗有治名朝廷以緒有威畧徙朔州總管

陳孝意河東人少有志尚以貞介知名大業中為侍御史父憂去職居喪過禮未嘗起授鴈門郡丞在郡菜食齋

居朝夕哀臨每一發聲未嘗不絕倒於時政刑日紊孝意清節彌厲發姦摘伏動若有神吏民稱之煬帝幸江都馬邑劉武周殺太守以叛孝意率兵與武賁郎將王智辯討之戰於下館城反為所敗武周轉攻傍郡百姓洶洶懷反側前郡丞楊長仁鴈門令王確等謀應武周孝意陰知之族滅其家郡中皆戰慄莫敢異志武周引兵來攻力戰拒之每致克捷但孤城獨守外無聲援孝意誓以必死每遣使江都道路隔絕竟無報命日暮向詔勅庫俯伏流涕悲動左右圍城百餘日糧盡為校尉張倫所害以城歸武周

王頌字景彥太原祁人父僧辯為陳武所害隋文帝伐陳  
 頌自請行陳平有司錄其戰功將加柱國頌以怨耻已  
 雪不敢受賞帝從之拜代州刺史甚有惠政  
 趙仲卿隴西天水人開皇中拜朔州總管於時雲代間盛  
 興屯田仲卿總統之治以嚴猛事多克濟由是收穫歲  
 廣邊戍無餽運之憂會邊警仲卿為方陣四面拒戰經  
 五日高顛率大兵至合擊破之以功進上柱國

唐

李道宗字承範東平王韶子貞觀三年為大同道行軍總  
 管助李靖立功邊上

李說字巖甫鄭孝王亮之後累封隴西縣男說精於職築  
 天成軍邊備積完官至檢校禮部尚書節度使

李靖字藥師京兆三原人姿貌瓌偉有文武材畧貞觀二  
 年以兵部尚書為代州道行軍總管率驍騎三千自馬

邑直趨惡陽嶺四年進擊定襄破之獲隋齊王子正道  
 送京師以功封代國公又以靖為定襄道行軍總管復

定襄恒安地斥境自陰山北至大漠還拜尚書右僕射  
 張儉字帥約京兆新豐人初為朔州刺史有惠政檢校代

州都督儉勸墾田力耕歲數稔乃建平糴法入之官由  
 是儲斛流贏遷營州都督去



薛仁貴絳州龍門人驍勇善射以士伍起爲大將屢立奇功後以事流象州帝念仁貴功拜右領軍衛將軍檢校代州都督威振邊疆聞薛將軍名者皆相視失色外程務挺洺州平恩人少以勇力聞拜右領軍衛中郎將立功雲州嗣聖初進左武衛大將軍務挺善綏禦士咸服其威愛

王忠嗣華州鄭人雄毅寡言有武畧試守代州別駕大猾閉門自斂不敢干法累遷左威衛將軍代北都督大同朔方節度使天寶元年戰於桑乾河三遇三捷耀武漢北而還進軍磧口上安邊十八策築大同靜邊二城忠

嗣本無勇敢及爲將乃能持重訓練士馬隨闕繕補有漆弓百五十斤每發之示無所用以兵仗授士卒雖弓矢亦誌姓名其上軍還遺弦亡鏃皆按名第罪以故人皆自勸器甲充物自朔方至雲中袤數千里據要險築城堡斥地甚遠自張仁愿後四十餘年忠嗣繼其功

郭子儀華州鄭人以武舉累遷副都護天寶十四載安祿山叛詔子儀爲衛尉卿充朔方節度子儀收靜邊軍斬周萬頃擊高秀巖河曲敗之遂收雲中馬邑開東陁東段文楚隴州汧陽人太尉秀實之孫咸通末爲雲州防禦使時李國昌鎮振武國昌子克用欲得雲中引兵攻之

戰歿鬪雞臺下

柳公綽字寬京兆華原人幼孝友性質嚴重舉賢良方正直言極諫由校書郎累遷刑部尚書太和四年爲河東節度陞北風稱勇武爲九姓六州所畏公綽治廢柵十  
一募兵三千畱屯塞上其妻母來太原者令夫人飲食問遺之由是懷感故悉力保鄣以病乞代去官

劉沔字子汪徐州彭城人初爲振武牙將累遷大將軍振武節度使開成三年築都護府西北四壘武宗初遷檢校尚書左僕射會昌二年拜河東節度進屯鴈門時天德防禦副使石雄佐沔屯雲州沔召之謀迎還太和公

主以功加檢校司空

盧簡方初爲太原節度府判官累遷大同軍防禦使大開屯田練兵儲餉咸皆畏附入拜太僕卿領大同節度

後五代

康思立山陰人少爲騎將從唐莊宗破梁以功遷指揮使明宗時爲應州刺史有善政

吳巒字寶川鄆州盧縣人唐清泰中爲大同節度判官遼師過雲州節度使沙彥珣出城迎謁爲遼所執城中推巒主州事巒卽閉門拒守遼以兵圍之晉高祖立以雲州入於遼而巒猶守城不下遼師圍之凡七月高祖義

巒所為乃以書告遼使解兵去而召巒為武寧軍節度副使後殉城於貝州

李嗣本本姓張氏鴈門人少事唐太祖賜姓名累以戰功

遷雲州防禦使從莊宗擊劉鄩於故元城還軍振武後

蔚州破嗣本戰歿

宋

田重進幽州人形質奇偉有武力積功領天德軍節度使

雍熙中北征重進率兵連下飛狐靈邱等城進攻蔚州

其牙校李存璋殺蕭嘏里執耿紹忠率吏民來附會曹

彬師不利乃還

潘美字仲詢大名人雍熙三年詔為雲應路行營都部署

率兵出鴈門拔寰朔雲應等州師還吏民皆內徙

楊業并州太原人幼倜儻任俠善騎射初事劉崇屢立戰

功號無敵太宗聞其名及來歸以為右領軍衛大將軍

遷代州刺史以功授雲州觀察使雍熙三年副潘美為

雲應路行營都部署攻拔寰朔雲應四州護遷州民於

內地尋寰州復陷業戰於陳家谷口身被數十創士卒

殆盡猶力戰餘勇可賈馬重傷不能進遂為所擒不食

三日死上聞之痛惜詔贈太尉大同軍節度

遼史作楊繼業

薛超遼州平城人少有勇力由虎捷卒積功至神衛軍都

校雍熙三年從潘美北征至鴈門西陁屢著戰績追至  
 寰州其將趙彥辛以城降超連被劒流血濡甲縷部分  
 軍士自若乘勝抵應州其節度副使艾正以城降還加  
 馬步軍都軍頭按宋史薛超遼州平城人此平城為今和順縣地隋開皇十六年始置平城縣屬太原郡至宋元祐初隸遼州金改儀城縣元至元三年省入和順迄今因之則超非雲產矣省志舊志俱收入人物蓋誤以宋之平城為兩漢北魏之平城耳且抹去本傳遼州二字尤屬牽合第攷超傳雍熙三年從潘美北征於鴈門西陁乘勝攻下寰應二州實有功北邊列之宦蹟與潘美田重進等同例

遼

張儉宛平人性端慤不事外飾統和十四年舉進士第一

調雲州幕官故事車駕經行長吏當有所獻聖宗獵雲

中節度使進曰臣境無他產惟幕僚張儉一代之寶願

以為獻先是上夢四人侍側賜食人二口至聞儉名始

悟召見容止樸野訪及世務占奏三十餘事由此顧遇

特異所至以明幹稱太平中為大同軍節度使後仕至

太師封王

耶律斜軫字韓隱於越曷魯孫統和初為北院樞密使會

宋師分道來侵以斜軫為山西路兵馬都統至定安遇

賀令圖軍擊破之又破於飛狐取蔚州宋軍在渾源應

州者皆棄城走驍將楊繼業率兵出代州斜軫佯退伏

兵發進攻至狼牙村遂擒繼業以功加守太保

耶律題子字勝隱北府宰相兀里之孫統和四年從耶律  
 斜軫擊敗宋師於定安授西南面招討都監率兵攻蔚  
 州聞外援至夜伏兵道旁伺過未半而擊之城軍出  
 斜軫復邀之殺傷甚衆應州守將自遁進圍寰州冒矢  
 石先登宋軍大潰當斜軫擒楊繼業於朔州題子功居  
 多焉

耶律頗的字撒版系出季父房咸雍八年爲彰國軍節度  
 使道宗獵大牢古山頗的謁於行宮帝問邊事對曰自  
 應州南境至天池皆我耕牧之地清寧間防禦不謹爲  
 宋所侵烽堠內移似非所宜道宗然之拜北面林牙後

遣人使宋得其侵地命頗的往定疆界大康四年遷忠  
 順軍節度使

蕭速撒字禿魯堇突呂不部人性沉毅清寧中爲彰國軍  
 節度使咸雍十年以北院樞密副使經畧西南邊撤宋  
 堡障戍以皮室軍上嘉之

耶律學古字乙辛隱於越注之庶孫乾亨二年爲彰國軍  
 節度使時南境未甯民思休息乃禁約以安之會宋將  
 潘美率兵分道來侵學古以軍少虛張旗幟爲疑兵是  
 夜適獨虎峪舉烽火擊之獲捷自是學古與潘美各守  
 疆域民獲安業

大同府志 卷之七 金

完顏宗賢本名阿魯歷歸德永定軍節度皆有治聲天德中除忠順軍節度使賜玉帶捕盜司執數人至府宗賢問曰罪狀明白否對曰獄具矣宗賢閱其案謂僚佐曰吾察此輩必寃不數日盜果得人服其明

幹魯韓國公劾者子天眷中從都統杲襲遼於鴛鴦灤天祚西走西京已降復據城西浮圖下射攻城者幹魯與鶻巴魯攻浮圖奪之復以精銳乘浮圖下射城中遂破西京

闍母世祖第十一子宗翰攻西京闍母與妻室等於城東

爲木洞以捍蔽矢不於北隅以芻茭塞其隍又爲四輪草車高出於堞闍母與麾下乘車先登諸軍繼之遂克西京遼兵三萬列營於西京之西闍母以三千擊之曰以一擊十不致之死地不可戰也乃使士卒去馬陣於溝塹間人皆殊死鬪遂敗遼兵追至其營而止

完顏守貞陳王希尹孫大定二十五年爲西京警巡使世祖愛其剛直再遷同知西京留守事御史臺奏守貞治有善狀上謂侍臣曰守貞勲臣子又有材能全勝其兄守道宅口可用也明昌中進西京留守後至平章政事

完顏宗翰國相撒改長子天輔五年副都統杲西征會議

奚王嶺杲軍出青嶺宗翰軍出瓢嶺期於羊城灤遼兵遁去西京叛耿守忠以兵來救宗翰率麾下衝擊之守忠敗走宗翰已撫定西路州縣還軍雲中承詔以田種千石米七千石賑新附之民會宋人來請割諸城宗翰奏言西鄙未寧割付山西諸郡則諸軍失屯據之所請姑置勿割太宗從之

完顏宗幹太祖庶長子從都統杲取中京宗翰移書言遼在鴛鴦灤可襲取之杲不能決宗幹力請從其策乃會軍於羊城灤宗幹與宗翰以精兵六千襲遼至五院司遇遼將耿守忠戰於西京城東四十里守忠敗走天會

三年敗遼於應州西余睹谷

突合速宗室子孛罕塞人嘗領偏師捕獲雲中諸山盜匪及應州匪竊平之撫安其民而還

移刺胡刺大定二十六年爲彰國軍節度使應州僧與判大宗正事曹王永功有舊將訴事於胡刺求永功手書爲地胡刺得書奏之上謂宰臣曰永功以書囑事胡刺此雖細微不可不懲凡人小過不治遂至大咎有犯必懲庶幾能改是亦教也於是解永功職

丁暉仁字藏用大興府宛平人冲澹寡欲讀書之外無他好皇統二年登進士第自丞令累遷至刺史所在有治

聲改同知西京留守事首興學校以明養士之法終陝  
西西路轉運使

曹望之字景蕭遼季自臨潢移家宣德除西京教授大定  
中為德州防禦使有惠政百姓為立生祠改同知西京  
留守事上書論便宜事多見采納仕至戶部尚書

大懷貞字子正遼陽人大定中由沂州防禦遷彰國軍節  
度使縣尉獲盜得一旗上圖亢宿詰之有謀叛狀株連  
幾萬人懷貞請誅其首亂者十八人餘皆省釋嘗以私  
忌飯僧數人就中一僧異常懷貞問曰曾為盜殺人否  
對曰無之後三日詰盜果引此僧皆服其明察

馬惠迪字吉甫遼陰人天德三年進士再調昌邑令察廉  
第一補尚書省令史大定中出為西京留守判官以治  
最擢同知崇義軍節度事

裴滿亨字仲通臨潢府人大定二十八年擢進士第自奉  
御累遷中都西京等路按察使時世襲家豪奪民田亨  
檢其實悉還正之後轉河東南北路按察使卒於官所  
歷州郡皆有政績可紀

劉仲洙字師魯大興宛平人大定三年登進士第歷官以  
廉能稱章宗初除西京路提刑副使先是田穀等坐黨  
罪廢錮者三十餘家仲洙知其冤上書力辨帝從之乃



復毅官爵而黨禁遂解明昌二年同知大同府事移德  
 州防禦使後陞定海軍節度使致仕卒仲洙性剛直果  
 於從政尤長於治民所在有功迹時栢鄉人焦旭第進  
 士官至西京路轉運使警敏練達與仲洙並稱能吏云  
 按省志府志俱載劉仲誠死平人明昌間知大同府稱  
 良吏其文與仲洙畧同疑仲誠即仲洙之誤並非兩人  
 况仲洙金史有傳府志不載  
 而反載仲誠其為舛謬無疑

完顏匡始祖九世孫承安元年簽書樞密院事行院於撫  
 州迎擊障葛敗其兵匡遷三官奏乞以所遷官讓其兄  
 奉御養一上義而許之

程琢貞祐四年為西京副統智勇過人出私財募集壯士  
 二萬復取渾源白登有恢復山西之志以宣撫副使完  
 顏伯嘉奏同知西京留守事屯軍代北扼太和嶺諸隘  
 拒戰甚力後寓軍平定為本州提控閻德用所襲被害  
 抹撚盡忠上京路猛安人大定二十八年進士泰和中遷

西京按察使時畱守紇石烈執中跋扈自紫荆關走還  
 中都詔以盡忠為左副元帥兼西京畱守以功進官三  
 階未幾拜尚書右丞行省西京鎮撫守禦民甚賴之  
 幹勒合打益州本得山猛安人以蔭補親軍調山陰尉縣  
 當兵衝合打率土豪官兵身先行陣貞祐初以功遷本  
 縣令縣升為忠州充刺史州被兵久耕桑俱廢詔徙其

民於太和嶺南合打遙授同知太原府事仍領其衆其  
石抹元毅咸平府路人性沉厚武勇過人每讀書見忠義  
事未嘗不歎慕蔭補吏部令史累遷彰德府治中以邊  
警授撫州刺史元毅率吏卒三十餘人出州經畫軍餉  
遇戰身先士卒州倅及從吏堅請還元毅曰吾輩責任  
邊守乃思奔避其如百姓何縱得自安復何面目朝廷  
乎遂執弓矢令衆衆感其忠爭爲效死元毅力戰射無  
不中旣却復合元毅氣愈厲鏖戰久之衆寡不勝遂以  
身殉

李瞻薊州玉田人遼天慶二年進士天會間累遷德州防

禦使爲政寬平民懷其惠正隆末盜賊蠭起瞻爲忠順  
軍節度使增築城壘爲備蔚人賴之以安

蒲察鄭留字文叔東京路猛安人大定二十二年進士由  
陝西路按察使改順義軍節度使西京人李安兄弟爭  
財府縣不能決按察使移鄭留平理月餘不問會釋奠  
孔子廟鄭留乃引安兄弟與諸生敘齒列坐會酒陳說  
古之友悌數事安兄弟感悟謝曰節使父母也誓不復  
爭乃相讓而歸

完顏阿喜好學問襲父筭栢山猛安聽訟明決人信愛之  
察廉能除彰國軍節度副使及改上京留守判官提刑

司奏彰國軍治狀遷官後仕至河南路統軍使

元

木華黎扎剌兒氏猿臂善射多智畧以萬戶從太祖薄宣德遂克德興攻拔雲中九原諸郡進圖撫州木華黎率敢死士策馬橫戈大呼陷陣帝麾諸軍並進大捷

察罕唐兀烏密氏武勇過人從太祖畧雲中桑乾定薛擁重兵守野狐嶺帝遣察罕覘虛實還言彼馬足輕動不足畏也遂鼓行而前破其軍圍白樓七日拔之以功爲御帳前首千戶

速哥蒙古怯烈氏太宗以爲山西大達魯花赤方受命出

有回回六人訟事不實將抵罪急入奏曰此六人者以小罪誅之恐非所以懷遠人也願以賜臣臣得意辱之使自悔悟爲他日用帝意解召六人曰生汝者速哥也其竭力以事至雲中皆釋之後有至大官者其寬大愛人多類此子忽蘭襲父職時西方多盜郡縣捕不得法當計所失物直倍償郡縣苦之有甄軍判者率羣盜殺人渾源界而奪之財縣以失捕當償忽蘭曰此大盜縣豈能制卽遣千人捕甄殺之勦其餘黨害乃除

不忽木字用臣康里部人至元二十三年爲刑部尚書命往河東按獄會大同民饑不忽木以便宜發倉廩賑之

或奏言不忽木擅發軍儲帝曰使行發粟以活吾民乃其職也

闊闊出唐兀氏世祖時擢大同路廣勝庫達魯花赤廣勝

庫者貯兵器之所時總管唐兀海牙以庫作公署置甲

杖虛廩中多被蟲鼠害闊闊出言於上復之使者薛綽

不花納魯速丁檄取鷹房軍衣甲弓矢闊闊責其入文

書領去憲副速魯蠻令毋入文書且命有司封鑰其庫

將黜視之闊闊出不從事聞命答速魯蠻罷之大德元

年陞大同路武州達魯花赤

按闊闊出官大同稱職省志誤收入人物今更正

阿沙不花本康里國王族來居興和之天城以大同興和

兩郡當車駕所經有帷臺嶺者數十里無居民請詔有

司作室嶺中徙邑民百戶居之割境內昔寶赤牧地使

耕種以自養從之阿沙不花既領昔寶赤帝復欲盡徙

興和桃山數十村之民以其地為昔寶赤牧地阿沙不

花固請存三千戶以給鷹食帝皆聽納民德之飲食必

祭焉

劉伯林濟南人好任俠善騎射授都提控命選士卒為一

軍招降山後諸州太祖北還留伯林屯天成錄功賜金

虎符充西京留守兼兵馬副元帥從破火山聞喜諸州

縣時欲徙聞喜民實天成伯林力爭止之在威寧十餘

平務農積穀與民休息鄰境凋瘵而威寧獨爲樂土子  
黑馬字孟方襲父職爲萬戶太宗時授都總管萬戶統  
西京河東諸軍尋命巡撫天下察利病會應州郭志全  
叛脅從誑誤者五百餘人有司議盡戮之黑馬止誅爲  
首數人餘悉從輕典初伯林嘗曰吾聞活千人者後必  
封吾所活何啻萬餘人子孫必有興者黑馬果能世其  
家云

李德輝字仲實通州潞縣人操履清慎嗜讀書中統三年  
爲山西宣慰使權勢家籍民爲僕者咸按而免之復業  
近千人至元中徵拜右三部尚書命錄囚山西河東行

至懷仁民有魏氏發得木偶持告其妻挾左道爲厭勝  
獄詞皆具德輝察其寃知魏有愛妾疑爲妾所構陷召  
鞠之不移時而服遂杖其夫而論妾以死

馬亨字大用邢州南和人習吏事以材幹稱世祖時釐諸  
路戶口以亨副八春忙哥撫諭西京俾民弗擾旣還圖  
山川形勢以獻他使者多以賄敗惟亨等各賜衣九襲  
旌廉能焉

趙炳字彥明惠州灤陽人初侍世祖於潛邸恪勤不怠及  
世祖次桓撫間以炳爲撫州長城邑規制爲之一新  
謝睦歡豐州豐縣人太祖過兀刺城睦歡從攻西京力戰

先登連中三矢仆城下太宗見而憐之命軍校拔其矢  
縛牛剗其腸裸而納諸牛腹中良久乃甦誓以死報每  
戰必身先之官至太原路達魯花赤

曹伯啟字士開濟寧陽山人延祐初官刑部侍郎命往大  
同督徵逋負錢先是宣慰使法魯忽丁撲運嶺北糧歲  
數萬石肆為欺罔贓鉅萬前後遣使廉察皆受賂反為  
之游言最後伯啟往其人已死喻其子弟曰負官錢雖  
死必徵徒賂人無益也第條汝父所賂之數官為徵之  
諸受賂者皆懼潛歸賂於其子得鈔五百餘萬緡民之  
逋負而無可理者列土悉免之

張志明字士瞻輝州人皇慶五年除西京宣慰使咸  
並行邊境乃安

歸賜字彥溫汴梁人登至順元年進士初服官鋤奸擊強  
人不敢以年少易之至正五年僉廉訪司事行部西京  
以法繩趙王府官屬之貪暴者王三遣使請不為動宣  
寧縣有殺人者蔓引數十人一讞得其情盡釋之

王居禮字子敬泰定間知應州修學開渠著有善績  
韓浩便宜都元帥兼應州彰國軍節度使善拊循士卒一  
軍傾心又愛護百姓性持正人不敢干以私至今土人  
猶知有韓元帥云

崔敬字伯恭大寧惠州人通刑名法律之學至元六年由御史出僉山北廉訪司事按獄宣寧有李秀坐造偽鈔連數十人皆與秀不相識敬疑而讞之秀曰吾以訓童子爲業捶楚之下不敢不誣服耳敬詢知始謀者乃大同王濁十餘年事不泄而有司誤以李秀爲王濁也移文至大同果得王濁爲真造偽鈔者人皆傳頌之朱尹宣寧人性敏達知懷仁縣治民有方上官見其能遇疑難事無不委之尹剖決如神獄皆得情旣去耆老思之爲之立碑

孫德謙河南睢州人任中書省歷大同行省平章事徐達遣將圍大同德謙嬰城固守知力不能支乃手書自決作詩數章詞義激烈城陷不屈死

明

同北口與天兵世歿

德命兼山西行省平章事

李文忠字思本盱眙人洪武二年以偏將軍從右副將軍常遇春出塞遇春卒文忠代將其軍聞大同圍急遂自太原出鴈門以便宜邀敗於馬邑進至白陽門天雨雪文忠移營前五里阻水自固夜乘間來劫堅壁不動質明出精兵左右擊大破之明年拜征西左副將軍率十萬人出野狐嶺至興和降其守將六年以左都督行山西邊至白登獲太尉不花復追奔至羶帽山進師豐州

追及百千兒乃還

章存道龍泉人御史中丞溢子溢集義兵存道撫其眾遂

成練卒授處州衛指揮副使洪武三年守平陽轉左衛

指揮同知從湯和北征守哈墩不刺營五年從征陽和

力戰段頭山死之

汪興祖巢人洪武元年以都督率師既下永平遂西取大

同將三衛卒守禦再敗元兵三年進克武朔二州至大

同北口與元兵遇復敗之尋命兼山西行都督府僉事

後從傅友德伐蜀中飛石死

鄭允先天台人洪武間任渾源知州仁愛有

詣

學與諸生講論經史歲餘閭閻充足俗尚醇厚士風蒸

然興起立祠祀之

陳立誠洪武間知應州創建悉出經畫改築城池移修廟

學規模宏遠永為依賴

張文煥洪武間任白洋鎮巡檢忠勇有清操邊警文煥率

弓兵二百人奮勇徑進中流矢歿妻聞之亦自縊以殉

遺一子貧不能自活召至京以父俸給之

王達善江南無錫人洪武間任大同府學訓導學問淵博

氣度和雅遇諸生恩義兼至稱經人兩師嘗著梅花百

咏後累官翰林學士



大同府志 卷之二十七 三  
蔣文煥長安人洪武八年任山陰知縣時國祚初定百務未興文煥建衙署修學宮置庫樓設義塚有功德地方入祀名宦祠

陳質建文時以叅將守大同進中軍都督同知助宋忠保懷來忠敗退守大同代王欲舉兵應燕質持之不得發及燕兵攻大同不下蔚州廣昌附於燕質復取之成祖卽位見殺

士士嘉字道亨武城人建文中由國子生除大同山陰知縣善決疑獄有齋錢百緡臥樹下失之者士嘉曰此樹爲祟吾將治之趨駕出土民傾城往視偵不往者果得

盜代王內藏失物戶局如故士嘉曰此必狙公教狙竊之乃陳幣於庭呼羣狙過伺而觀之果有狙攫去詰其主皆服人以爲神官至禮部右侍郎

王良永樂間以戶部主事來督大同軍餉甚有威信爲士民所服

周郁濟南人永樂間知渾源州時旱蝗郁齋沐虔禱蝗飛出境川南有虎傷人郁牒於神是夜虎果入籠中後陞

荆州知府所在民有餘思  
鄭亨合肥人嗣大興左衛副千戶靖難兵起從破紫荆關取蔚州直抵大同封武安侯仁宗初拜征西前將軍鎮

大同墾田積穀邊備繕完宣德間再鎮大同轉餉宣府  
 歸附者相屬九年卒於鎮諡忠毅亨嚴肅重厚善撫循  
 耻措克大同鎮守中官撓軍政亨裁之以理其人不悅  
 然其卒也深悼惜之

柴車字叔輿錢塘人由舉人授武選司主事歷員外郎中  
 宣德五年擢兵部侍郎明年山西巡按御史張勗言大  
 同屯田多為豪右占據命車往按得田幾二千頃還之  
 軍後仕至兵部尚書

羅俊合肥人襲金吾左衛指揮同知宣德十年調任天城  
 衛景泰天順間戰於蕭牆山磨兒山黑石崖破堡子等

處屢捷後官延綏叅將

周濟字大亨洛陽人永樂中舉人正統初擢御史大同鎮  
 守中官以驕橫聞敕濟往廉之濟變服負薪入其宅盡  
 得不法狀還報上大嘉之

羅亨信字用實東莞人永樂二年進士宣德中為御史清  
 軍山西有聲命食按察僉事俸待遷正統中以右僉都  
 御史巡撫宣府大同汰諸衛冗官老弱者四百八十餘  
 人叅將石亨請簡大同民三之一為軍亨信奏止之晉  
 右副都御史巡撫如故時遣官度二鎮軍田一軍八十  
 畝外悉徵稅五升亨信言永樂時詔軍盡力墾田毋徵

稅陛下復申命之今奈何忽為此舉防邊諸軍無他生業惟恃田作况邊地磽瘠霜早收薄若一收稅則民不復耕必致竄逸上納其言景帝初晉左副都御史

李隆字彥平和州人襄城伯濬之子雄偉有將畧好讀書年十五嗣封從成祖北征屢出奇策在南京清慎守法正統五年召入總禁軍十一年巡大同賜寶刀一申飭戒備內外凜凜訖還不僂一人

李儀涿州人以薦舉進英宗初始設諸邊巡撫僉都御史丁璿方督大同宣府軍儲而儀以右僉都御史巡撫其地盛有所建置號令一新督糧叅政劉璉不職儀劾之

璉亦誣儀適叅將石亨欲奏鎮守中官郭敬罪先咨儀儀誤緘咨牒於核餉主事文卷中戶部以聞亨敬遂相許命儀璉自陳而切責敬等璉止停俸二歲儀雖引罪自負其直詞頗激被劾下吏瘐死儀居官廉謹人素德之建昭德祠以祀璿上元人永樂中進士由御史擢居是職後為副都御史所至有政聲

魏源字文淵建昌人永樂四年進士累遷刑部尚書正統二年命往大同宣府督察諸將便宜從事源按行天城朔州諸險要令將吏分守免屯軍租一年儲火器為邊備諸依權貴避役者悉括歸伍邊務修飭

朱榮字仲華沂人以總旗從軍累官至左都督永樂十二年充總兵官鎮大同修忙牛嶺兔毛河赤山榆楊口來勝諸城圍垣雄峻以功封武進伯子冕嗣正統四年佩征西將軍印鎮大同十四年從北征戰於陽和死之諡

忠愍

按明史朱榮父子俱鎮大同有功舊志載冕而不及榮殊挂漏

陳懷合肥人襲父職真定副千戶積功至都指揮使涖山西都司事正統二年以左都督鎮大同時以日給廩餼為軍民累懷言於朝得減省後封平鄉伯死於土木之

難

鄭辰字文樞浙江西安人永樂四年進士由監察御史累

遷兵部左侍郎正統間與豐城侯李彬轉餉宣大鎮守都督譚廣撓令劾之事以辨得風疾告歸辰為人重義輕財初通籍產悉讓兄弟在山西時與同僚杜僉事有違言杜卒為治喪資遣其妻子

盧睿字仲思婺之東陽人永樂辛丑進士為御史廉正明決正統丁巳陞右僉都御史巡撫宣大嚴法令剋蠹弊節費廣儲摧強撫弱上疏言馭遠之道在恩威相濟辛酉改命叅贊寧夏軍務以疾歸性孝友廉介見義勇為家無餘資而貧困者多賴之

霍瑄字廷璧鳳翔人由鄉舉入國學授大同通判以武進

伯朱冕薦就擢知府初英宗至城下瑄與理餉侍郎沈固等出謁叩馬號泣衆露刃叱之不爲動因獻英宗服物出金帛犒軍英宗嘉歎及復位瑄由山西右叅政徵拜工部右侍郎旣而巡撫上瑄治行賜誥旌異瑄在大同巡撫年富被逮瑄資其家還里爲鎮守太監韋力轉所惡撻之十餘至是以聞且言力轉僭侈不法狀力轉被逮訐瑄上兩釋之

郭登字元登武定侯英孫博聞強記善議論好談兵由勲衛累功署都指揮僉事正統十四年車駕北征扈從至大同超拜都督僉事充叅將佐總兵官劉安鎮守及議

旋師登告學士曹鼐等駕宜入紫荆關王振不從遂及於敗時大同軍壘蕭條城門晝閉人心洶洶登慷慨奮勵修城堞繕兵械拊循士卒弔死問傷親爲裹創傅藥曰吾誓與此城共存亡不令諸君獨死也駕至閉門不納英宗遣人謂登曰朕與登有姻何拒朕若是登奏曰臣奉命守城不知其他景帝監國進都督同知充副總兵尋代安爲總兵官後登率兵入援京師奏至而圍已解上優詔褒答晉右都督條上用兵方畧十餘事景泰元年春戰勝於沙窩以八百人破數千騎捷聞封定襄伯四月又勝於土城六月再却之鎮守中官陳公與登

構上遣人代公還登愈感奮及英宗還代王頌登功乞  
 降敕獎勞兵部言登已封伯乃止二年以老疾乞休不  
 許時沈固在大同久事多廢登劾奏之而薦尚書楊寧  
 布政使年富又言大同既有御史又有巡按御史僉都  
 御史任寧宜止巡撫宣府上悉從之其秋以疾召還登  
 為將兼智勇紀律嚴明動輒制勝初至大同士卒可戰  
 者纔數百馬百餘匹越二年馬至萬五千精卒數萬屹  
 然成巨鎮登去大同人思之

許貴字用和江都人襲父成永新伯以武進伯朱冕薦為  
 山西行都司督操大同諸衛士正統末守備大同西

路從石亨戰陽和後口敗績貴力戰得還英宗北狩大

當衝要人心恟懼貴以忠義激戰士力為備守晉都

指揮使景泰元年充右叅將再遷都督同知大同乏馬

命求民間得八百餘匹所司不給直貴為請乃予之嚴

紀律明賞罰士皆樂為用中官韋力轉淫虐眾莫敢言

貴獨劾奏二年疾還京

李福真寧人由監生任大同府同知英宗北狩福冒險進

貢久無怠志復辟後擢本府知府進叅政仍管府事

黃彪平樂人正統間以舉人知應州賑濟有方催徵不擾

祀名宦

張鵬字騰霄涑水人景泰二年進士授御史出按大同宣  
黃府奏兩鎮軍士敝衣菲食病無藥死無棺乞官給醫藥  
棺槨設義塚俾饗厲祭死者蒙恩則生者勸帝立報可  
且命各郡邑概行之大同賦同賦其案其詳其詳其詳  
年富字大有懷遠人以會試副榜注銓景泰二年由河南  
右布政擢右副都御史巡撫大同提督軍務時經喪敗  
法弛弊尤甚富一意拊循奏免秋賦罷諸州縣稅課局  
停太原民轉餉大同武清侯石亨武安侯鄭宏武進伯  
朱瑛令家人領官庫銀帛糴米實邊多侵沒富首請按  
治詔宥亨等抵家人罪亨所遣卒越關抵大同富復劾

亨專擅亨輸罪已削襄垣王府菜戶又杖其厨役之署  
教授事者已又劾分守中官韋力轉叅將石彪及山西  
叅政林厚罪是時富威名重天下諸豪家愈側目相與  
撫富罪當事大臣于謙力保持之上亦知富深故得行  
其志六年母憂起復七年富上言諸鎮守監鎗內官增  
於前如陽和天城一城二人擾民殊甚請減汰事格不  
行又言洪武定制軍官私罪收贖惟笞則然杖卽降授  
徒流俱充軍律甚明今屢變更輕皆復職重惟立功刑  
不足懲更無顧憚此皆法官過也於是廷議流徒輸贖  
如故惟於本衛差操不得復領軍矣英國公張懋及鄭

宏各置田莊役軍耕種富劾之還軍於伍天順元年革  
巡撫官富亦罷歸頃之石彪以前憾劾富逮下詔獄李  
賢稱富能祛弊上曰此必彪爲富抑不得逞其私耳已  
而事果無驗令致仕後召任戶部尚書

胡貞扶風人先知永和景泰間以最擢知應州買牛給耕  
雪冤除獄政聲益茂祀名宦

章綸桐城人景泰中以給事中謫應州判擢本州知州洞  
達治體案無畱牘敏練仁恕有功地方後歷官至叅政  
董昇亳州人景泰五年襲天城衛指揮僉事成化中累遷  
至都指揮使充大同遊擊將軍著績邊垣賜勅獎勵入

署後府都督僉事

王宇字仲宏祥符人正統四年進士天順二年爲右副都  
御史巡撫宣府命兼撫大同石亨及從子彪驕恣大同  
其舊鎮地徵索尤橫宇抗疏論其姦乞置之法疏雖不  
行聞者敬憚督餉郎中楊益不能備芻藁爲宇所劾戶  
部庇之宇並劾尚書沈固等皆輸罪性剛介所至有盛  
名終大理寺卿

王越字世昌濬縣人善射涉書史有大畧登景泰二年進  
士由御史超拜山東按察使天順七年大同巡撫韓雍  
召還上難其代喟然曰安得如雍者而任之李賢薦越



召見上喜其岸異即擢右副都御史以行甫至遭母憂奪情視事越乃繕器甲簡卒伍修堡砦減課勸商為經王久計以援延綏有功累遷至左都御史入為兵部尚書仍掌院事十六年出師援榆林越提督軍務與監軍汪直將輕騎循塞垣而西越盡選宣大兩鎮兵二萬出孤店潛行至貓兒莊分數道至威寧掩擊之大獲封威寧伯晉太子太傅大同總兵官孫鉞卒即命越代之後加少保卒諡襄敏命兼職大同右軍文安公

楊信字文實六合人幼從從父洪驍雄奮勇以是知名累功封彰武伯充延綏總兵官天順三年代李文鎮大同

成化初命信佩將軍印總諸鎮兵往禦水泉營及朔州屢却之遂東入大同因詔信還鎮六年與副將徐恕叅將張瑛分道出塞有功璽書獎勵前後三十年鎮以安靜人樂為用卒諡武毅

李秉字執中曹縣人正統元年進士累遷右僉都御史巡撫宣府天順初改督江南糧儲會廷議復設巡撫大臣薦秉才遂命巡撫大同都指揮孫英先以罪貶職還備總兵李文妾引詔書令復職秉至即斥之裨將徐旺領騎卒操練秉以旺不勝任解其官怨謗紛起會天城守備中官陳例久病秉請易以羅付上責秉專擅徵下詔

獄法司希旨斥為民尋起故官進左都御史成化二年  
 出大同更將帥申軍令而還未幾命為總督與武清伯  
 趙輔分道出塞大捷賜麒麟服加太子少保入為吏部  
 尚書致仕命巡撫大同備許縣英武以罪領烟墩  
 陳壽字本仁寧遠衛人成化八年進士授戶科給事中視  
 察宣府大同劾去鎮守中官不檢者後仕至刑部尚書  
 鄭寧字志道祥符人正統間進士成化中以左僉都御史  
 巡撫宣府逾年移大同時疆場無事寧延見境內士大  
 夫咨詢民瘼次第舉行士民胥悅致仕歸囊無餘貲聞  
 居十四年服食淡泊數至匱乏詔有司歲給米四十石

孫博字約之景州人成化中太監汪直與都御史王越保  
 國公朱永將團營軍北征博以紀功從先是博為給事  
 嘗疏論直直恚甚至是請以為從或危之博曰諫吾職  
 也死生榮辱吾命也將安避乎既抵大同每出戰輒令  
 隨營博意氣峭拔兜鍪繡襖馳騁萬眾間如健將間聚  
 議機宜益侃侃雄辨久之直亦敬服師還論功遷山西  
 按察使僉事

周璽字廷玉遷安人襲世職指揮使習兵書善騎射充右  
 叅將分守陽和成化十六年從王越征威寧海子晉都  
 指揮使十八年戰黑石崖有功進署都督僉事遷大同

副總兵十九年秋分守懷仁聞總兵官許寧大同失利  
亟還兵援壘大呼陷陣少却久之短兵接臂中流矢拔  
鏃戰益奮勁圍乃解以功予實授宏治中佩征西將軍

印察勦僉事

劉寧字世安山陽人襲職指揮使成化十八年為左叅將  
分守陽和十九年因大同總兵官許寧被圍於夏米莊  
寧援兵至乃退無何復入境寧將兵三千連勝於聚落  
站白登柳林小鵝鴿峪時諸將多失利許寧以下獲罪  
寧超遷都督同知改左副總兵協守大同與偏頭關總  
兵周璽並著功績時稱名將宏治十三年大同告警命

為副總兵從平江伯陳銳禦之銳無將畧與寧不協無

功還

溫恭天城衛人成化十六年以世職從戰威寧海子有功

陞本衛指揮僉事進同知授懷遠將軍宏治中守備天  
城正德間累陞都督僉事掛印鎮守大同寧陽鋪設軍  
分調所獲甚眾尋移鎮寧夏

余子俊字士英青神人景泰二年進士成化二十年以戶

部尚書兼左副都御史總督大同宣府軍務其冬還朝  
明年復出大同先是子俊巡撫延綏東起清水營西抵  
花馬池延袤千七百七十里咸鑿崖築牆掘塹其下連

北不絕每二三里築堠臺崖砦備巡警又於崖砦空處築短牆橫一斜二如箕狀以瞭遠避射牆內之地悉分屯墾及巡宣大請行延綏邊牆法因歲歉而止比復議余欲行之言東起四海冶西抵黃河延袤千三百餘里舊有墩百七十應增築四百四十墩高廣皆三丈計役夫八萬六千數月可成詔明年四月卽工而歲比不登上下難之予俊又欲責成於守臣而已不親其事謗議遂起至冬疏請還改左都御史巡撫大同爲中官章敬讒構危甚賴工部侍郎杜謙等平情勘奏得致仕去二十三年上悟子俊無罪復召爲兵部尚書子俊嘗曰大臣謀國當身任利害豈得遠怨市恩爲自全計其所修邊垣迄爲數世利云

李敏字公勉襄城人景泰五年進士成化時歷山西四川左右布政使擢右副都御史巡撫大同修治垣塹堠烽無警大同孔廟無雅樂敏上奏得頒給如制居三年召爲兵部右侍郎累遷戶部尚書先是敏在大同見山東河南轉餉至者道遠耗費乃會計歲支外悉令輸銀民輕齎易達而將士得以其贏治軍裝交便之至是并請畿輔山西陝西州縣歲輸糧者每糧一石徵銀一兩以十九輸之依時值折軍餉有餘則召糴上從之北方二

稅皆折銀由敏始

孫洪字伯大山東昌邑人景泰間進士成化中由河南布

政擢右副都御史巡撫大同以威寧海子之捷進左副

都御史食正二品俸

邱璐字仲玉蘭陽人成化壬辰進士由給事中累遷至山

西左叅政分守大同沉靜博學凡建白施設多中民隱

卒於官家無餘貲歸無室處人以是高之

謝綬字朝章朝城人成化甲辰進士由知縣累遷右僉都

御史巡撫大同綬至鎮簡練軍實墾田殖穀威名流聞

塞上又設伏險阨以嚴戒備日對將吏商軍務方畧夜

治文書按圖籍指畫山川險易撫恤士卒調給芻糧燕

犒無不周至屢奉璽書褒美以勞成疾卒於官

歐信字孚先薊州人成化甲辰進士以郎中督餉大同增

置東大有倉乘賤易粟備用歲積至五十萬石歷陞右

副都御史巡撫大同始至卽選將訓兵綜理屯牧修舉

廢陞未逾年卒

洪漢字天章成化壬辰進士授部曹歷陞右副都御史巡

撫大同叅贊軍務撫恤軍民搜剔蠹弊風紀振而邊境

肅然上疏極言便益地方八事而增守備以專責任演

神機以期實用置方田以裕屯貯寬住俸以惜逃官尤

為八事中切要者因觸忤中官回籍

張文質扶風人成化間以舉人知渾源州時有妖狼為祟

牒城隍攝狼至磔於南墀之右歲旱禱雨立應渾源境

獨稔尋調知澤州去民思之為立碑

陳梁涇陽人成化中以舉人任渾源知州地有恒山素禁

樵採梁請弛禁民獲利南人充大同軍役不服水土多

死者梁上其狀遂各調本土衛所軍民圖像祀焉陞

州同知

于璧新城舉人成化間任渾源州學正學富教嚴集諸生

號舍朝夕啟迪人才極一時之盛徵拜御史

蔣琬江都人襲祖貴定西侯爵成化十年督十二團營兼

總神機營兵上言大同宣府腴田無慮數十萬悉為豪

右所占請遣給事御史按覈定其科額嚴戢豪右毋得

侵奪章下所司雖不盡行時論韙之十三年帥京軍防

秋大同宣府陳機宜十餘事皆報可以功累加至太保

薛敬之字顯思渭南人從蘭州周蕙游以歲貢生入國學

與同舍陳獻章並有盛名成化末選應州知州課績為

天下第一遷金華同知

韓福西安前衛人成化十七年進士為御史按宣府大同

數條奏軍民利病人士胥悅之

張俊宣府前衛人嗣職本衛指揮使累擢大同遊擊將軍  
宏治十二年以功進都指揮同知大同鋒警俊遣兵三  
百邀其前復分兵三百爲策應而親禦之荆東莊依河  
結營擊卻三萬餘騎上大喜立擢都督僉事代王璽爲  
總兵官未幾移鎮宣府去

王獻臣字敬止其先吳人隸籍錦衣衛宏治六年進士由  
行人擢御史巡大同請亟正諸將姚信陳廣閉營誘避  
及馬昇王杲秦恭喪師罪悉蠲大同延綏旱傷逋賦以  
寬軍民上多從之

許進字季升靈寶人成化二年進士宏治元年擢右僉都  
御史巡撫大同時士馬盛強邊防修整咸服其威會與  
分守中官相訐謫兗州知府後仕至吏部尚書

李介字守貞高密人成化五年進士歷兵部左侍郎宏治  
十年兼左僉都御史督餉大同且經畧之介大修邊備  
察核官田牛具錢還之軍以其資償軍所逋馬價人皆  
悅之先後條上便宜二十事卒贈尚書

石玠字邦秀藁城人成化末年進士宏治中爲御史出覈  
大同軍儲條奏悉中機宜正德中以右副都御史巡撫  
大同後官至戶部尚書玠有操行居官持正

史琳字天瑞成化丙戌進士性宏豁喜談兵爲給事巡按

多建白三為提督初赴宣府大同治兵食以防其後尋以捷聞宏治乙丑宣府失利琳奉命出師與大帥分駐宣府大同諸路捷再上褒賚有加終都察院右都御史胡汝礪寧夏衛人成化中進士宏治間知大同府敦大敏給允善摘伏稱神明時鎮守中官統京軍駐雲剽竊為民患汝礪繩之急中官怒即移疾求去吏部惜其才固留之由是益發舒敢任事戢豪強黜貪墨風紀肅然累遷至兵部尚書

劉大夏華容人天順八年進士宏治十年大同行師乏糧大夏以戶部侍郎出經畫之或曰大同糧草半屬京貴

子弟公剛介此行恐取禍大夏曰處天下事以理不以勢定天下事在近不在遠候至彼圖之既至詢咨父老得其要領揭榜通衢云某倉缺糧若干石每石給官銀若干凡境內外官員客商願輸者米自十石以上草自百束以上聽即中貴子弟不禁也不兩月倉場有餘積家有餘財

楊志學字遜夫彭城衛人宏治六年進士十七年以戶部郎中督大同糧儲綜理周密商民戴之正德間累官僉都御史巡撫大同以鎮靜為治甚得軍士心後仕至刑部尚書



陳伯安錦衣衛人宏治十五年以進士知山陰縣洞達治  
理案無留牘大修邊備民賴以安行取御史攀轅者盈  
路不絕大同縣尉孫賦

杭雄字世威由綏德衛總旗積功至叅將擢都督同知武

宗幸宣大雄扈從卽拜大同總兵官嘉靖初移鎮延綏

十二憲字維綱東平人宏治三年進士授知縣正德中累遷

右副都御史巡撫大同以應州防禦功廕錦衣百戶

王時中字道夫黃縣人宏治三年進士授知縣召拜御史

正德中出按宣大逮繫武職貪汚者百餘為東廠誣奏

誦成劉瑾誅起用終刑部尚書

馬隆陝西中部人正德間任大同府推官性沉毅執法如

山然廉平不苛無滯獄後戍卒變將鼓譟入王府隆挺

身往戍卒聞風皆退無敢譁者

孫璽字朝信平湖人正德戊辰進士任山西僉事嘗奉命

丈量場地土清其地之為奄戚所漁奪者悉歸之民大

同經兵餘卒伍驕悍少不當意輒負怙跳擲以為常璽

巡大同盡心撫馭人賴安堵且累著戰績以贊畫功賜

資後罷歸

何棟字伯直長安人正德辛巳進士累遷左僉都御史巡

撫大同是時彗星見棟知期年後當有災至鎮申嚴紀

律拊循管伍高山一戰獲全勝邊境肅然未幾左遷四  
川叅議

車純字秉文上虞人正德丁丑進士累擢山西布政使叅

議分守大同大同扼邊而險時戍卒不靖將薄近郊純

轉餉調兵多方經畧文武大吏依如長城歲稔民饑純

發邊儲賑之蘇活無算撫按以最績上陞雲南按察副

使

杜旻錦衣衛人初為御史有直聲正德十六年知大同府

時法令廢弛旻保境庇民不為權貴所撓士民賴之

楊文奎隆德人正德間知靈邱縣性剛方有為築關廂建

學舍祀神祭器之屬無不周具境內一新後以戰功陞

應州知州邑人勒石頌德

許繼章邱人正德間知渾源州泄官清勤自奉甚約雖古

廉吏不能過及卒囊無緡錢人為歎息

黃卿益都人正德九年進士任應州知州慈祥愷悌每歲

儲粟以贍貧民修城池通樵採民尤永賴

韓邦靖字汝度朝邑人與兄邦奇同登正德三年進士嘉

靖初為山西左叅議分守大同歲饑人相食奏請發帑

不許復抗疏千餘言不報乞歸不待命輒行軍民遮道

泣雷抵家卒未幾邦奇亦以叅議蒞大同父老因邦靖

故前迎皆泣下邦奇亦泣秦晉人盛傳之  
許宗魯字東侯陝西咸寧人正德中進士嘉靖初以御史  
按宣大大同將卒驕悍宗魯罪其尤甚者如法將卒帖  
然先是太監劉祥侵沒邊餉以萬計而罪止罷鎮宗魯  
請下獄祥大懼卽如數抵還

毛伯溫字汝厲吉水人正德三年進士嘉靖中累官右僉  
都御史巡撫山西未赴十八年詔伯溫總督宣大大山西  
軍務大同所轄鎮邊鎮川宏賜鎮河鎮會五堡相距二  
百餘里自巡撫張文錦以築堡致變後無敢議修者伯  
溫曰變所由生以任用匪人非建議謬也卒營之募軍

三千給以閒田永除其賦邊境賴焉錄功加太子少保

大同府志卷之二十七終

大同府志卷之二十八

大同府知府吳輔宏纂輯

官蹟下

明

蔡天祐字成之睢州人宏治十八年進士累遷山西按察

使嘉靖三年大同兵變巡撫張文錦遇害詔曲赦之擢

天祐右僉都御史巡撫大同入城諭軍士獻首惡衆心

稍定會尚書金獻民出師甘肅大同亂卒疑見討復鼓

譟殺知縣王文昌圍代王府上責天祐必獲首惡天祐

令千戶苗登禽斬其首郭鑑等十一人鑑父郭疤子復

糾徐瓊兒等爲亂天祐捕戮徐瓊兒明年又獲志子等  
人心大定晉副都御史巡撫如故父老爲立安輯祠

詹榮字仁甫山海衛人嘉靖五年進士以戶部郎中督餉  
大同值兵變殺總兵官李瑾總督劉源清率師圍城久  
不下榮素有智畧善應變叛卒掠城中無犯榮者外國  
益急榮密約都指揮紀振遊擊戴濂鎮撫王寧討賊察  
叛卒馬昇楊麟無逆志乃陽令寧持官民狀詣源清所  
爲叛卒乞原而陰以榮謀告請宥昇麟死昇三千金俾  
募死士自劾會源清已罷巡撫樊繼祖許之昇麟遂結  
心腹擒戮首惡黃鎮等九人榮乃開門延繼祖入復捕

斬二十六人錄功擢光祿寺少卿後遷右僉都御史巡  
撫甘肅二十三年以大同巡撫趙錦與總兵官周尚文  
不相能詔榮與錦易任黑山之戰以功晉右副都御史  
代府奉國將軍充灼行剽榮奏奪其祿充灼等復謀據  
大同榮告尚文捕得皆伏辜又築東路邊牆設墩堡請  
召軍佃作嗣與尚文戰捷彌陀山以功晉兵部左侍郎  
又以繕邊報最累被獎賚召還理部事當榮撫大同與  
總兵尚文皆有才畧邊垣鎮謐自後代者多不逮以故  
益思榮等云

黃綰字宗賢黃巖人承祖蔭以議禮入翰林累遷至禮部

左侍郎大同軍變殺總兵官李瑾據城拒守總制侍郎劉源清提督郤永議屠之城中洵懼外援引爲助邊城大震巡撫潘倣請止兵源清力詆倣大學士張璠及廷議並右源清縮獨言非策及源清罷侍郎張瓚往代未至而郎中詹榮等已殲靖之而亂卒未盡獲軍民瘡痍甚代王請遣大臣爲之綏輯乃特以命縮且令察軍情勘功罪得便宜行事縮馳至大同宗室軍民牒訴官軍暴掠者以百數無告叛軍者縮一無所問以安其心嗣大集軍民曉以禍福罹害者陳牒佯不問而密以牒授給賑官按里核實一日捕首惡數十人卒尚欽殺一家

三人懼不免復倡亂無應者遂就擒縮復圖形購首惡數人軍民不復虞誑誤乃令有司樹木柵設保甲四隅創社學教軍民子弟城中大安還朝列上文武將吏以罪源清永皆被逮而增縮俸一等焉

趙炳然字子晦劍州人嘉靖十四年進士爲御史與給事中李文進覈宣大山西兵餉劾前後督撫樊繼祖史道監司楊銳指揮馮世彪等一百七十七人侵冒罪坐謫有差條上十二事後以兵部尚書兼右都御史總督宣大山西軍務新平平遠保平三堡密邇宣府舊屬大同天城相去六十里孤懸塞外隔崇山炳然奏添設叅將

別爲一營報可尋以功被資召還部加太子少保

翟鵬字志南撫寧衛人正德三年進士性剛介歷官以清操聞嘉靖二十一年宣大總督樊繼祖罷除鵬兵部右侍郎代之疏言論將士功罪宜平情覈實不當拘成例上從之受事僅百日以連乞兵餉奪職其年秋邊烽告急起鵬故官甫受命兵已退解乃浚濠築垣修邊牆三百九十餘里增新墩二百九十二護墩堡一十四建營舍一千五百間得地萬四千九百餘頃募軍千五百人給五十畝省倉儲無算舊例兵皆團操鎮城聞警出戰每夏秋間分駐邊堡鵬請入秋悉令赴塞盡地分守

九月中還鎮遂著爲令二十三年以功進兵部尚書上倚鵬請輒從而責劾甚急乞罷弗允會廷議撤宣大三關客兵鵬在朔州聞完縣報警夜半至馬邑調兵食復趨渾源遣諸將往禦之御史楊本深兵科戴夢桂劾鵬逗遛逮下詔獄卒人咸惜之

王忬字民應太倉人嘉靖二十年進士二十九年以順天巡按馳守通州上知其能超擢右僉都御史三十三年上手敕吏部命忬撫大同比至鎮上書具言歲祲乏軍興狀請大司農金錢十萬賑之活者萬計以功晉兵部右侍郎尋代楊博總督薊遼與時相不合構罪死

大同府志 卷之二十一  
梁震新野人襲指揮使廉勇善訓士嘉靖初充陝西總兵官晉右都督十五年移鎮大同大同變軍連殺巡撫張文錦總兵官李瑾繼瑾者魯綱威不振兵益驕廷議以爲憂移震往震素蓄健兒五百人至則下令軍中申約東鎮兵素憚震由是帖服戰牛心山及宣寧灣紅崖兒數奏績進左都督與督師毛伯溫修鎮邊諸堡不數月功成卒諡武莊震前後百十戰未嘗少挫時率健兒出塞皆自効及卒健兒無所歸守臣以聞編之伍後頗得其力代震者祝雄遼東人自山西副總兵遷鎮大同亦善撫士被劾去

周尚文字彥章西安後衛人多謀畧精騎射襲指揮同知屢著戰功嘉靖二十一年以都督府知充總兵官鎮大同請增餉及馬兵六部議格之而尚文與巡撫趙錦不協乞休弗允御史王三聘乞移之他鎮廷議大同衝扼尚文假此以避不宜墮其謀乃移錦甘肅尚文以戰黑山功進右都督鶉鴒谷之役尚文備陽和遣騎四出戰有功賜勅獎勞會議築邊牆自宣府西陽和至大同開山口延袤二百餘里以屬尚文乃益築陽和以西至山西了角山凡四百餘里堠臺千餘斥屯田四萬餘頃益軍萬三千有奇上嘉其功進左都督加太子太保充灼謀



變尚文偵諒得其間加太保自尚文涖鎮與巡撫詹榮等規畫戰守士民息肩者數年歸者相屬二十七年彌陀山圍尚文督諸將出援圍乃解尚文轉戰次野口獲捷而還旋以大同兵援宣府錄功賜賚有加其年卒尚文得士死力故所向有功宿將王效馬永梁震皆前卒惟尚文存威名最盛焉

馬芳字德馨蔚州人十歲被掠潛自亡歸周尚文鎮大同奇之署為隊長嘉靖二十九年授陽和衛總旗戰威遠新平堡泥河有功累遷指揮僉事三十六年擢宣府總兵官隆慶初大同被兵視宣府尤甚總督陳其學令總

兵官趙可扼紫荆關而懷仁山陰多所未靖可坐貶三秩遂調芳與易鎮威遠幾破會其學赴救而芳軍亦至獲捷芳乃將兵出右衛戰威寧海子勝之塞上遂無事尋復鎮宣府以疾歸芳起行伍十餘年為大帥大小百十接以少擊衆未嘗不大捷威名遠震為一時將帥之冠子林由蔭累官大同叅將萬歷二十年以功晉副總兵四十七年殉開原

俞大猷字志輔晉江人從趙本學學易推衍兵家奇正虛實之權從李良欽學劔乘諸生嗣世職百戶舉嘉靖十四年武會試二十一年詔天下舉武勇士巡按上其名

大同府志 卷之六  
兵部毛伯溫爲尚書送之宣大總督翟鵬所論兵事屢折鵬鵬謝曰吾不當以武人待子下堂禮之然亦不能  
用後十餘年爲浙江總兵勦岑港倭而御史劾之令立功塞上大同巡撫李文進習其才與籌軍事乃造獨輪車以攻陣嘗以車百輛步騎三千獲勝安銀堡文進上其制於朝遂置兵車營京營有兵車自此始詔還世蔭萬歷初卒於後府僉書

楊博字惟約蒲州人嘉靖八年進士三十五年代許論爲兵部尚書博未終父喪疏辭而上以大同右衛告急改博總督宣大山西軍務博墨線馳出關未至侍郎江東

等以大軍進右衛圍六月守將王德戰亡芻粟且盡士死守無二心博厚加褒卹奏行善後十事以給事中張學顏言畱博鎮撫奏蠲租因僉其丁壯爲義勇分隸諸將造偏箱車二輛令習車戰又以大同牆圯繕治爲急次則塞銀釵驛馬諸嶺以扼紫荆路於大同牛心山諸處築堡九墩臺九十二接左衛高山站以達鎮城濬大壕二各十八里小壕六十有四五旬訖功賜勅獎賚加太子太保畱鎮如故博先後數出奇兵並議築故總督所創邊牆招民千六百餘人又請通宣大荒田水利薄其租報可旋移薊遼總督後晉吏部尚書少師致仕

王之誥字告若石首人嘉靖二十三年進士由知縣累遷河南叅議調大同兵備副使以功增俸一級進山西右叅政大封留驗收姑蘇武安等處山言兵並請築姑蘇許論字廷議靈寶人吏部尚書進子嘉靖五年進士好談兵幼從父盡知險易以知兵聞累官右副都御史兵部左侍郎三十三年出督宣大山西軍務奸人呂鶴初與邱富以左道惑衆叛論遣兵捕鶴並誅其黨以功進右都御史再晉兵部尚書時邊備盡撤而守臺論請改築於牆外每三百步建一臺俾公石相及上置女牆營舍守以壯士十人下築月城穴門通出入度工費不過九

萬金數月而足詔立從之三十五年召還代楊博爲兵部尚書

楊武字宗文岐山人以進士知濬州有聲擢大理寺左寺丞受勅勘視大同察核屯田不均軍役耗損諸弊政釐正裁革彈劾不少避人咸誦焉超拜左僉都御史巡撫宣府

江東朝城人由進士累官兵部右侍郎嘉靖三十五年總督宣大軍務甫抵任烽警大作東選銳士戰却之召還部視事二十七年春大同右衛圍急數月餉道不通復以東總督軍務設策得通餉城中士氣百倍選集主客

兵數萬圍乃撤東即日入衛城所運糧凡四千餘石軍民感泣呼聲震地進兵部尚書協理軍政尋復總督宣大軍務四十四年卒諡恭襄

侯鉞字義甫東阿人嘉靖辛丑進士由工部郎中出為山西屯田僉事築龍門邊擢副使整飭陽和兵備大將軍

仇鸞行邊司道皆伏謁鉞獨長揖不伏鸞初不悅及與語縱橫指畫旁若無人鸞奇其才謂軍門曰此中嶽嶽

侯君一人兵備三月拜右僉都御史巡撫大同尋致仕岳懋陝西人嘉靖二十三年為大同總兵官五月懋巡邊

至青坨塔陷伏中戰死指揮薛綦已奪圍出太息曰士將死我何用生復陷陣死之贈懋左都督諡壯愍立祠

綦亦贈蔭耐亨南逢吉字元真陝西渭南人嘉靖間由進士累官大同兵備副使時邊務廢弛將士無能知陣法者逢吉授以奇

正方員諸紀律早夜練習為攻守具盡復演場之為豪右侵據者數巡三關外簡部伍嚴亭障旗幟壁壘煥然

一新名傳塞上又條上便宜五事為執政所忌中以蜚語罷歸

胡宗憲字汝貞績溪人嘉靖十七年進士由知縣擢御史巡按大同具悉關塞險易將卒勤惰會詔徙大同左衛

胡宗憲字汝貞績溪人嘉靖十七年進士由知縣擢御史巡按大同具悉關塞險易將卒勤惰會詔徙大同左衛

軍於陽和獨石卒聚而譁宗憲單騎慰諭乃定

焦澤大同後衛人剛毅有謀以遊擊從總兵周尚文戰彌陀鳳凰皆先登大捷陞西路叅將調守東路時修東城未完澤知有警預爲設備未幾警告賴以無虞嘉靖三十三年總兵大同邊疆寧謐人敬憚之

張達涼州人目不識書慷慨負奇節膂力絕人嘉靖二十二年以故總兵赴軍前立功戰勝鐵裏門二十九年充大同總兵官時小鶯坨塔墩口告警巡按御史胡宗憲趨戰達素勇敢好離營繞關挺身陷陣圍數匝達四面馳擊多披靡馬蹶死副將林椿分擊於彌陀山聞達被

圍馳援不克中流矢死贈達左都督謚忠剛椿都督同知謚忠勇

趙奇榆林人以左副總兵協守大同嘉靖三十二年以邊功署大同副總兵事隆慶間充大同總兵官常督將士立功被賚蔭一子千戶

王邦直磁州諸生偉幹多力嘗持千金器移數處不爲疲號玉千金以臺諫薦兵部檄送督府待以殊禮嘉靖乙巳秋鶉鴿峪告急邦直佐守將張鳳射却之轉戰而前復大合鳳與邦直結方陣以拒鳳戰死或勸邦直潰圍出邦直撫膺曰吾以腔血報軍門鳳死吾豈忍獨生遂

揮刃向前馳擊數十人圍益急外援絕知不得脫乃拔佩刀自刎督府上其狀贈指揮僉事立祠陽和祀之

劉祐字淑修東萊掖人嘉靖癸丑進士由司理累擢都察院右僉都御史巡撫大同時兵戈相繼咸爲祐難之祐諷咨利害得其要領謂雲中西連東勝東接右衛聲勢聯絡自二邊失守險莫可圍五堡之役復以兵變不終遂孤懸不支宜乘時生聚更休控險成犄角之勢漸復五堡援右衛屯田訓士且戰且守庶有寧宇於是相地形增亭障稽覈耗漏率厲勇敢戒諸將各守分地毋輕出邊政大舉歸者相屬祐疏請便宜處置千人以上則

爵其魁游徼卒敢遮掠者罪制曰可當是時微祐雲中幾殆然祐治軍嚴諸統袴子弟不得竄籍冒功遂騰蜚語祐亦念母甚移疾歸

史道涿州人嘉靖十五年廷議大同兵變後多警選才望者爲巡撫道以大理少卿改僉都御史巡撫大同至鎮會同總兵梁震戰於玉林川等處捷聞勅賜獎勵進副都御史墾闢五堡近水地人士享其利立祠祀焉

李瑾大同右衛人嘉靖初爲大同中路叅將兵警薄西路瑾率師赴之或曰非汎地也瑾曰比肩共事何彼此之有以功擢總兵官鎮守大同與士卒同甘苦然持法嚴

凡烽埃失警者不少貨以故鎮兵亦竊恨之叛卒王福  
勝等數十人懼誅夜攻瑾瑾親格鬪力竭解胄抽佩刀  
李曰吾爲大將豈可死叛卒手遂自刎  
楊總錦衣衛人嘉靖間知大同府方正自持輕徭薄賦餽  
遺一無所受有懸魚之風

王誥西平人嘉靖間知大同府寬大精明囑托不行貨財  
不染未幾以憂去尋陞湖廣叅政民甚思之

郭從道徽州人嘉靖間以舉人知應州募民開墾荒地勤  
於勸課歲大熟流亡相率來歸戶口增倍

殷尚質天津衛人世襲指揮僉事充大同叅將嘉靖三十  
二年大同巡撫侯鉞被圍尚質率所部馳援乃解去以  
功擢副總兵後戰歿廣寧

馬呈書廣平人嘉靖中以鄉科起家知大同縣饒才華善  
剖決民以訟至者立判之稱神君秩滿擢本府同知督  
府倚重入爲郎中尋復出知大同府鎮撫有方尤加意  
學校三雲軍馬間絃誦時聞擢運使致仕歸

惠之翰清澗人嘉靖間以舉人任大同通判時鴈門糧餉  
奸人侵漁翰廉而實之法飲冰茹檠遇事能身任不辭  
勞怨嘗語人曰苟利於民此官可棄何恤乎人言

桂琳石埭人知廣靈縣蠲煩滌苛一意蘇息每秋多方儲

積及春以貸貧不能耕者去之日百姓涕泣攀留不忍  
 舍恐言人曰許光宗乾州人嘉靖間以舉人知山陰縣縣多水患築隄  
 捍之舊城卑薄請之撫按重築始堅厚至督課諸生撫  
 卹百姓尤足多焉

劉漢平魯衛人嘉靖三十九年任大同總兵官叛人邱福  
 趙全李自馨等居古豐州築城建墩構宮殿甚麗號曰  
 板升時鎮兵積弱漢憤甚謀選精銳襲之斬八十三級  
 生擒七十二人焚其宮室餘衆奔匿幾獲全捷聞上去  
 悅漢等陞賞有差

王朗三原人嘉靖十五年以舉人任山陰知縣時城垣頽  
 圯井堙民苦遠汲朗尅日修濬其他闕政皆次第舉行  
 在任八年以最擢陞知州

王崇古字學甫蒲州人嘉靖二十年進士喜談兵具知諸  
 邊阨塞隆慶四年總督宣大山西軍務功績懋著加太  
 子少保兵部尚書總督如故是時邊疆寧謐東起延永  
 西抵嘉峪七鎮數千里軍民樂業不用兵革詔晉太子  
 太保萬歷中加少保卒謚襄毅

方逢時字行之嘉魚人嘉靖二十年進士隆慶四年以右  
 僉都御史巡撫大同撫綏有功進兵部右侍郎兼右僉



都御史甫拜命以憂歸萬歷初起故官總督宣大山西軍務累晉兵部尚書兼右副都御史總督如故五年召理軍政復列上五事尋代崇古爲尚書累加少保致仕逢時才畧明練處置邊事皆協機宜其功名與崇古相亞稱方王云

吳兌字君澤紹興山陰人嘉靖三十八年進士隆慶間以右僉都御史巡撫宣府累功進兵部右侍郎萬歷七年秋以左侍郎召還部

麻貴大同右衛人隆慶中任大同新平堡叅將時山陰懷仁應州烽警將吏並獲罪獨貴與兄副將錦戰有功受

賞萬歷初遷大同副總兵十年以都督僉事充寧夏總兵官無何徙鎮大同貴頻以功蒙賜賚後被劾去錦由大同叅將進本鎮副總兵從趙尙出塞有功與弟貴並著保境績撫字攸宜歸者甚衆萬歷間終宣府總兵官鄭汝璧縉雲人隆慶戊辰進士由部曹累遷兵部右侍郎兼僉都御史總督宣大山西軍務泄任疾作然日夜召將吏議戰守計檄行諸道修城堡練士卒治器械不自知其憊也疾甚乞罷歸卒

許希孟固始人隆慶間分巡大同僉事強幹有威望凜凜以風紀自持當時頌其績者有政如冰霜奸宄消亡之

艾祀米脂人隆慶三年以僉事分巡大同躬自儉約率僚屬饋遺無所受人亦卒不敢遺時值邊警杞內紀軍餉外佐陳行境賴以安以勞瘁卒於官

韓應元歷城人隆慶初以進士知懷仁縣釐正祀典均平夫役歷久猶遵其法陞評事去

劉復禮山海衛人隆慶間以舉人知渾源州介直廉明御下嚴肅聽訟令民自解解即不復問遇士大夫有禮然未嘗貶法狗之碑包州城建鄉賢名宦祠月再課士出俸資供具而時周恤其貧困者衙有苦井一夕變甘人

咸異之閱八年陞工部員外郡人立石頌德焉

傅延耆歷城人隆慶間以貢士知應州值烽烟孔棘延耆多方設備恃以無恐辦山糧不辭利害惠愛在民祀名宦

苗淳然字直齊直隸曲周人隆慶六年由進士任山陰知縣承前令積敝簿書不報者繁於蝟毛所司責期會甚急甫至任按籍口決數十事旬日間論報輒盡能聲大著未幾調繁臨朐去

喬密字汝登陝西同州人隆慶中以舉人知廣靈縣墾荒田興學校鋤豪右郵斃寡奉檄甃城殫力董役功成踰

百年壯麗如初陞霸州知州去  
 吳百朋字惟錫義烏人嘉靖二十六年進士歷兵部右侍  
 郎萬歷初奉命閱視宣大山西三鎮百朋以糧餉險隘  
 兵馬器械屯田鹽法等八事核邊臣督撫王崇古吳兌  
 總兵郭琥以下陞賞黜革有差又進圖凡關塞險隘歷  
 歷如指掌以省母歸  
 鄭洛字禹秀安肅人嘉靖三十五年進士隆慶時為山西  
 參政佐總督王崇古巡邊有功萬歷二年擢右僉都御  
 史巡撫山西移大同入為兵部右侍郎七年以左侍郎  
 總督宣大山西軍務復以功加兵部尚書兼右副都御

史加太子太保十八年詔兼右都御史經畧陝西咸寧  
 甘肅及宣大山西軍務洛進兵青海尚書石星以宣大  
 事急請速召洛共計之洛既至與總督蕭大亨巡撫王  
 世揚邢玠等定議事乃晏息以功進少保未幾謝病歸  
 郭琥字宗器永昌衛人由總旗積功為大同副總兵萬歷  
 初擢總兵官代馬芳鎮大同以功累晉右都督重修大  
 邊東自西陽和西抵了角山延袤六百餘里每五里一  
 墩墩一卒更番瞭望親詣彈壓無敢要索琥在鎮數年  
 練兵積粟建置倉廩增飾城樓修築輿雲橋次第畢舉  
 為承平良將焉

曾乾亨字於健吉水人萬歷五年進士歷光祿少卿十八年勅兼監察御史閱視大同邊務劾罷總兵以下十餘人大同土兵歲餉萬二千石兵自徵之民不勝擾乾亨議留兵二百餘盡汰之屢奏事輒中機要晉大理少卿梅國正字克生麻城人少雄傑善騎射萬歷十一年進士嘗以監軍御史平寧夏有功累遷右僉都御史巡撫大同久之遷兵部右侍郎總督宣大山西軍務在鎮三年節省冗費銀十五萬兩有奇丁父憂去

王基號對滄青州衛人萬歷初以進士任大同知府重節義戢橫豪熟諳邊務歷分守河東道惠政周洽十六年

巡撫大同謹斥塚明賞罰練將士裁冗費通商賈嚴懲強禦奏錮豪宗四民寧帖邊方晏安累官戶部尚書

涂宗濬字鏡源南昌人萬歷中以進士授御史累遷宣大

山西總督晉尚書加太子太保乞休歸久之復起宣大山西總督力疾赴任甫數日遽卒宗濬前在鎮時持大體能得將士心聞復任咸踴躍比捐館多歎息泣下者

賈應元遵化人由進士累官右僉都御史萬歷間巡撫大同舉羨餘贖鍰以勞軍各路堡堦石凡土築者奏請磚包之與總兵郭琥同修興雲橋備極壯麗終兵部左侍郎

范錫定興人萬歷間以舉人任大同東路同知慈祥廉幹

大同府志 卷之六  
爲民造福規百年之計創建廣積倉宏敞精密甲於雲  
鎮磚包南關皆其營度歲款多方贍救民賴以活至於  
加意學校而計室家給資斧卽家人父子不啻焉其子  
孫累登科第人謂廉吏之報

湯兆京字伯閔宜興人萬歷二十年進士由知縣擢御史  
出按宣府大同請罷稅使張彞礦使王虎王忠皆不納  
入掌河南道居官廉正遇事慷慨屢爲黨人齟齬投劾

歸

喬允升字吉甫洛陽人萬歷二十年進士除知縣以治行  
高等徵授御史出按宣府大同甚著風采後至刑部尚

書

連格禹州人萬歷間知大同縣悃悞無華遇事剖決如流  
悉得其情士民德之陞御史

李熙大同後衛人沉毅有謀畧萬歷中佩征西將軍印鎮  
守大同時邊境寧謐熙訓練士伍秣馬厲兵常若有事  
召入掌後軍都督府

呂坤字叔簡寧陵人萬歷二年進士由襄垣知縣調大同  
多惠政善斷疑獄民德之如父母嘗自書門聯曰皇天  
下鑒此心敢不光明正直赤子來遊吾腹願言愷悌慈  
祥真不愧斯語徵授戶部主事

解經邦韓城人萬歷乙未進士任大同知縣端介不苟代  
府宗人頗豪橫好持吏短長爲民害經邦以禮繩束之  
卒不敢干以私累遷陽和兵備副使風紀肅然後至宣  
府巡撫

孫體元山東濱州人萬歷間以進士知大同縣下車卽慨  
歎學宮闕畧首捐俸鳩工鑿泮池建奎光樓規制一新  
久之陞工部主事去士民思之  
關場海豐人萬歷壬辰進士知大同縣嘗苦郵驛罷敝令  
將驛糧隨大糧徵入官庖以見銀鬻驛僱役人樂趨焉  
又起房課分上中下三等官覓人役民獲寧止

李應薦恩縣人萬歷癸丑進士任大同知縣闢荒田清糧  
額設兵備捍衛有功尤善決疑獄堂規肅然吏胥無敢  
爲姦利者去之日攀畱載道民久而思之

房守士齊河人萬歷丁丑進士二十六年巡撫大同時礦  
盜縱橫大爲民害收巨魁數人杖殺之盜少止歲饑出  
官錢募民轉運官民兩便去之日遺羨金九十兩悉籍  
以充餉軍民至今頌之

吳夢周直隸霸州人萬歷中以舉人知靈邱縣政簡肅持  
大體凡里民輸納計時定分數足則不令聽比遇里長  
令得拜起如屬員禮衆知自重有限數不敷者私賂里

長孟顯寬其比顯卽以所賂封納正賦由是不煩追呼而歲額自足一時風俗稱醇厚云  
沈學無錫人萬歷間以舉人任渾源州學正下帷攻苦擁臯比課讀每聚諸生講論輒過丙夜會文手定甲乙講席宏開教思不倦  
張宗衡臨清人萬歷四十一年進士天啟七年爲右僉都御史代張翼明巡撫大同引宿將滿桂爲助大修邊防崇正四年擢兵部右侍郎總督宣大山西軍務嘗奉命統諸將兵屢報捷於沁潞等處乃還軍陽和時來歸者衆宗衡悉受之安輯者萬二千餘人大同遂稱寧宇

劉以守浙江分水人天啟間以舉人任山陰知縣有應變畧又明於形勢蒞任後改河道築圍牆濬池濠製懸樓屹然巨鎮焉

王象雲山東新城人天啟五年進士知大同縣下車卽列上條議民風邊政如指掌頻歲旱潦多荒地象雲給牛貸種以招撫之又捍衛守禦有功擢御史官至山西叅議

鹿獻陽潁川人天啟乙丑進士除大同推官決獄以平恕稱尤諳習邊務嘗奉檄查邊所過城堡墩臺斥堠洞見利弊每當捍禦動合機宜城賴以存焉

胡良機字省之南昌人萬歷四十四年進士天啟間爲御史忤魏璫見斥崇正元年起故官按宣大二鎮年滿當

代以敏練再巡一年尋爲監視中官王坤所劾奪官滿桂蒙古人家宣府勇敢便騎射爲督師大學士孫承宗所知累遷掛印總兵官賜尚方劍加太子太師崇正元年大同總兵渠家楨失事以桂代之桂至徧歷八路七王十二城堡大修守備軍民恃以無恐明年拜武經畧戰歿

廬象昇字建斗宜興人天啟二年進士崇正九年詔以兵部左侍郎總督宣大二山西軍務大興屯政穀熟畝一鍾

積粟二十餘萬上諭九邊奉爲式明年春聞宣警卽夜馳至天城矢檄旁午因檄雲晉兵勿動戒邊吏毋輕言戰持一月乃潛召雲師西來宣師東來自督兵直子午出羊房堡計日鏖戰兵未遇先自解去象昇在陽和邊政肅如五月丁外艱候代乃墨纒從事尋晉兵部尚書九月督宣大二山西三總兵入衛十二月朔殉節鉅鹿

衛景瑗字仲玉韓城人天啟五年進士崇正十五年由大理少卿擢右僉都御史巡撫大同歲饑疫疏乞賑濟蒐軍實練火器戢豪宗聲績甚著十七年正月李自成將犯山西宣大總督王繼謨檄大同總兵官姜瓖阨之河



上瓌潛使納款而還景瑗不知也及山西陷邀瓌歃血誓死守瓌布訛言衛巡撫秦人將應流賊代王果疑之不與相見永慶王至射殺其僕會景瑗有足疾不時出兵事瓌主之瓌兄瑄以昌平總兵失律繫獄後放出就瓌力勸降賊瓌慮其下不從人犒之銀言勵守城將士代王信之諸郡王分門守瓌每門遣卒二百人助守至三月朔賊抵城下瓌即射殺永慶王開西門迎賊入給景瑗計事景瑗乘馬出知有變自墜馬下俄為賊所執自成欲官之景瑗不屈據地坐大呼莊烈帝而哭賊義之曰忠臣也不殺景瑗猝起以頭觸階石血淋漓賊引

出顧見瓌罵曰與吾盟而即叛神其赦汝耶賊使景瑗母勸降景瑗曰母年八十餘矣當自為計兒國大臣不可不死母出景瑗謂人曰吾不罵賊者以全母也初六日自經於僧寺賊歎為忠臣移其妻子空舍戒無犯見史本傳按李自成傳崇正十七年陷大同巡撫衛景瑗總兵朱三樂死犯宣府總兵姜瓖迎降巡撫朱之馮死又按朱之馮傳崇正十六年巡撫宣府明年三月李自成陷大同之馮誓死守城中官杜勛與總兵王承允開門降之馮自縊死文有互異謹附記於此

焦源溥字涵一三原人萬歷四十一年進士崇正七年擢

右僉都御史巡撫大同時邊事日棘兵缺伍餉又久之歲洊饑民淘馬糞以食源溥請蠲賑增餉當事不能應

踰年自劾求去遂罷歸十六年死關中

徐有聲字聞復金壇人崇正間以鄉薦特擢戶部主事歷

員外郎郎中督餉大同十七年闖賊之亂城陷不屈死

贈太僕少卿

蔣秉采字衷白全州舉人崇正中知靈邱縣七年八月募

兵守城力屈眾潰投繯死合門殉之守備于世奇把總

陳彥武馬如豸典史張標教諭路登甫並鬪死事聞贈

卹如制縣志作蔣炳彩通志作秉采與明史合從之

杜茂初由歲貢任山陰教諭博綜經史饒幹畧崇正元年

茂初與縣令劉併力守城部勒諸生分守堦口皆奔走

用命儼若士伍焉

王宗文龍游人崇正間以貢任大同縣丞佐縣令固守南

關備著勞績又嘗督運粟米採買硝磺公事濟而下無

派累其清勤充足多云

馬剛中字九如商城人崇正七年進士除大同知縣豐儀

善譚論雅重學校喜與士大夫講文義治尚寬平行取

授檢討乞假歸里城陷死

按明史商城知縣盛以恒與鄉官洪允衡馬剛中等守城

死剛中嘗知大同其重學校尚寬平見雍正八年大同

知縣陳世寶縣志稱允衡亦嘗官陽和兵備副使而宦蹟無考姑從闕焉

程良球黃岡人崇正間以舉人知渾源州申草草商除民

大害以憂去士民戴之

崔廓任邱人崇正間以舉人知懷仁縣條編官租成熟起

課民免包賠善政永賴

黃榜魁山東威海衛人崇正間以貢士任靈邱知縣邑有

劇賊一絡白者剽掠鄉村甚為民患榜魁廉得其踪跡

單騎督率丁壯捕獲之并其黨二十餘人悉寘之法地

方由是安堵

朱家仕河州人進士崇正末為分巡陽和兵備副使寬平

慈和博學通內典闖賊入大同或為謀他出可以後圖

家仕笑曰時事至此余生平叅驗謂何而惜一死以報

君父耶盡驅妻妾子女入井自抱金菩提一尊投入其

從容如此

李倬崇正十七年任山陰知縣流賊至死之

國朝

馬國柱遼東人魁偉有大畧順治三年總督宣大山西軍

務至則查覈屯政肅清衙宇條列數事皆著為令甲馭

軍尤有紀律在任二年多善政調江南總督去

王度山東泰安州人順治三年以進士任大同知縣精練

明敏治有聲姜逆之變道府篆多失獨縣印存親王

統師來討時平西將軍印猶未頒布檄徵餉調兵繫縣

印是賴度善招撫懷仁諸地以次定督運勸輸搜馬擒賊胥有功賊黨忌其能造度手書投營前爲反間王知其樸忠出書示之度勃怒檄詆賊家人九口胥爲賊所害事平議敘歷官至太常寺卿  
顏永錫順天大興人順治三年以進士任山陰知縣時田荒逋積乃招集流亡詳豁正賦一千九百餘兩加意作新殘民蘇息以治最陞去士民德之

梁化鳳字澧源陝西長安人順治三年以武進士官陽和高山衛守備精騎射饒謀畧善撫軍士能得其死力姜逆之變以忠義激勵之令厲兵以待大兵進勦遂率

所部從臨陣振臂大呼矢石如雨不少避大小七十餘戰所向有功七年四月收復郡三州一縣五衛二城八堡十寨八臺三洞十五胥克宣力焉晉都督僉事後以平海寇功擢至提督

周官順治元年任渾源州吏目直指嘗薦之姜逆之變死其官施邦政任山陰縣典史順治六年亦死姜變

李吐馨陝西同官人順治二年官靈邱縣典史姜逆之變集城下者數千人令素懼怯莫知所措吐馨招集鄉勇激以大義慷慨登陴士民胥感泣地當賊衝獨屹然堅守論者韙之

項一科順治四年任大同縣丞有能聲姜逆之變以死勤事

張肇斌順治五年任大同府西路同知姜逆之變以死事

榮爾奇山東德州人癸未進士由汾州冀南道左遷渾源

州知州剛毅明達政簡刑清士民甚愛之姜逆之變抗

節守城死順治十六年知州張崇德申請崇祀名宦祠

佟養昇遼東人順治間以旗職養馬大同姜逆之變巷戰

不屈死

管一舉順治間任得勝路叅將死姜逆之變

贈副將祀忠烈祠

宋子玉遼東人順治間任大同兵備道姜逆之變與通判

楊達朔州知州王家珍謀靖其患既而謀不克遂因手

刃愛子以死

徐一范江南蕪湖人以進士任禮部郎中轉大同兵備道

時業知姜瓖變私念猶子明弼知馬邑縣可藉以殺賊

驅車直前不少沮比至城下傷於槌蓋賊黨環匝一范

固無由察也至死罵不絕口

王宇春遼東人順治五年任陽和兵備道為政持大體撫

恤軍民甚有威惠戊子冬姜瓖據郡城變大兵圍城

大同府志 卷之六 宦蹟

三

陽和距大同僅百里方震叠不寧會有蘇副將者為仇家所誣大司馬自王營率勁兵猝至將窮治其通賊狀皆環甲而人民情益恟恟宇春以百口保之力為昭雪事乃解賊既平以足疾告歸邑人勒碑紀其事

佟養量字滄涵正藍旗人由佐領積功累加至輕車都尉順治六年擢兵部左侍郎兼右副都御史總督宣大山西軍務駐劄陽和時姜逆初平骸骨遍野為斂而葬之又建報忠祠祀一時死事者嘗錄重囚有張發者業斃於獄矣其族牽連多論死檢原案覆視特為省釋內丁楊洲玉寓齊生所獲藏鏹八百兩呼其子弟至悉畀之

修學宮習禮教射其中會部議衛所屯田照內地民田例起科養量疏言邊地種遲霜早沙磧相望加以兵旅之餘荒殘愈盛若必援例起科勢必聞風俱潰夫有人斯有財益下即益上疏上

俞允雲中人至今祠祀之

胡文燁字德輝滿洲人貢士順治七年由昌平知州擢知大同府時姜逆初平移府治陽和事事同草勅文燁通達政體精於吏事日侍制府佟帷幄商確指畫為經久計豁荒糧籌經費清訟獄理郵驛絕苞苴風紀肅然手輯雲中郡志十四卷未幾陞河東兵備副使

彭有德遼東人順治間任大同右衛叅將姜瓖之變抗節不從賊勢甚熾有德力禦不支單騎潰圍投親王帳家人六十餘口皆遇害賊平論勦撫功擢授大同總兵涖鎮宣布威德和輯兵民修築城堡橋梁廢墜漸舉康熙三年歲饑有德率先捐俸以賑全活甚衆軍民頌德不朽祀名宦

屈復泰直隸大興人順治間任大同鎮標中軍遊擊時姜瓖變後一切經制未定文武大吏以議不協構隙復泰多方調劑嫌疑冰釋軍民帖然巨盜劉三瘋自宣府竄入大同憑東郭廢寺爲負嵎狀捕卒皆畏蕙復泰奮勇直前擒獲之督府薦其能未及遷卒於官

范發愚河南進士順治五年知廣靈縣姜逆據大同渾源逆黨朱廷佐糾集千餘人剽掠村堡邑奸民李青許發旺等勾連賊衆攻圍縣城發愚以大義勸諭士民晝夜捍禦與城存亡仍調四鄉義勇救援後潛繼壯士赴英王麾下請兵勦滅之賊遂平歷陞江西道祀名宦祠郎永清遼東廣寧人順治六年以監生知渾源州時姜逆初平永清首立義塚瘞殘骸乃招流亡督開墾詳豁逋賦一萬餘兩販易者給母錢俾通貨器士民始有起色後以治行遷官去民爲立祠祀之

宋起鳳字紫庭滄州人順治十一年以副榜貢知靈邱縣  
 靈邱經闖寇繼以姜變民散田蕪賦役缺正額者以萬  
 計起鳳力請蠲除獲免糧銀三千二百六十餘兩徭銀  
 一千七百三十餘兩其他積逋並報罷流民漸復業起  
 鳳復時詣田間課之寢有起色及解組攀轅臥轍者踵  
 相接焉

孔化鳳山東恩縣人順治十四年由拔貢任大同知縣性  
 廉介嚴明查廢產清隱占讞獄平恕催徵有方胥役不  
 敢犯科而閭閻德之至修文廟建橋梁一時政績多可

紀述

羅森大興人順治丁亥進士知靈邱縣下車問疾苦鋤豪  
 強興教化簡刑訟招流移補驛騎勸耕作慈恕明斷遇  
 事迎刃解值逆璜變森獨嬰城固守斬偽使以狗防將  
 謀內應森正色抗言切責之卒不敢動既而援師大集  
 城賴以全

譚從簡山海衛人康熙元年以舉人知靈邱縣靈邱通賊  
 屢屢前令宋業請豁免隨遷官以去從簡蒞任雅諳民  
 間利病百廢具舉當時謠曰前無宋憑誰種後無譚更  
 不堪靈邱以循吏稱者二人為最

曹溶字秋岳浙江嘉興人康熙六年任陽和兵備道學問



閱博處兵瑣瘡痍間賑荒馭吏胥有績雅稱歎徐明經  
 化溥馮觀察雲驤才亟旌之時學政叢弊溶籍制俾不  
 敢逞魏敏果象樞雅參議焉尋以裁缺去仕至侍郎  
 董遂昇直隸河間人康熙間以拔貢授知縣遷大同府西  
 路同知性敏給尤善聽斷不假鈎致具能得情偽有重  
 獄業定擬察其誣卒開釋之而真奸徒於法督撫監司  
 皆倚為重後擢漢中知府以去

何玉相瀋陽人廕生康熙四年任山陰知縣召民開墾荒  
 田四百四十餘頃履畝勸課歲倍收穫屯田為民力請  
 給軍分種邑人至今感德不衰

岳宏譽字聲國江南武進人康熙十七年以進士任靈邱  
 知縣距前令宋二十年宏舉雅愛慕之歲大旱力請於  
 上官豁荒地糧除包賠丁銀復條陳平糶救荒策洞中  
 窾要輯志乘飾廟學建鄉賢名宦祠皆踵宋遺蹟而增  
 成之論者以為真足媲美云

王度漢陽人康熙十一年以副貢知靈邱縣度少讀書時  
 嘗歎子產治鄭武侯治蜀得為治大體及蒞官心存仁  
 恕而能濟之嚴明吏民無敢犯法久而胥愛頌之以疾  
 卒於署葛帷布被敝衣數襲而已百姓哭之

薛侯陝西三原人康熙十七年以舉人知懷仁縣寬平愛

民頻歲饑力請蠲免正賦賑濟有方百姓賴以活者甚衆上官每見必稱之曰真民父母分校鄉試所得皆二晉名士募民開墾荒地調任壺關去民思之不置云  
吳一蜚字翼生江南蘇州人康熙丁未進士授山陰知縣甫蒞任卽捐俸修葺文廟召民開墾清出額內荒田九十三頃十九年邑大荒詳請緩徵民甚德之後累官至吏部尚書  
石佳彝字宗六奉天人康熙二十年以監生知懷仁縣出金賑荒給牛種又立義學崇異諸生見者多興起在任五年擢廣平知府去民樹碑識之

李煊斗字谷愚江西新淦人康熙中知廣靈縣值歲旱疫詳免絕戶錢糧兼籲賑濟一如所請民皆感頌並招徠勸墾流亡復業府倉捐貯米石歲令各屬運送殺虎口廣靈應運七百石煊斗力爲民請設法調劑通省照糧公捐其治蹟多類此

董學詩字以言遼陽人康熙二十六年任懷仁知縣年甚少而精敏待士撫民胥得治體草火耗清行戶立義倉飾廟學歲大饑勸輸以賑之民無流逋在任三年治行爲當時最

甯朝鼎字坦園直隸永平人康熙三十九年由歲貢任山

大同府志 卷之六  
陰知縣敏幹有治劇才多所修葺凡衙署學宮及各祠廟無不整飭境內一新在任十一年去之日百姓立碑

頌德

洪璟字崑霞號秋山江南歙縣人由拔貢知交城縣遷霍州知州康熙五十年以賢能擢大同知府剖斷如神豪猾斂迹北關多可耕地以堆貯草束閉不得入越十餘年廠內草束僅二十萬而封閉如故乃捐俸築牆斂爲一區餘地悉還之民民至今德之  
許惟訥字省文江蘇婁縣人由進士起家性廉介所至有聲雍正元年擢授大同知府益奮勵有爲以興利除弊

爲已任府西南口泉村額徵商畜兩稅向係堡長經收完納後乃委員稽查因緣爲奸頗爲擾累惟訥曰稅課第無虧正額足矣柰何以掎克病吾民立撤回委員令舖戶自納并嚴堡長代徵之禁至今便之村民立碑頌德

陳際熙字枚從雲南石屏州人雍正三年改天鎮衛爲縣際熙以舉人來知縣事時庶事更始一意振作晨坐堂上治文書至夜分乃罷逾年百務具舉專務與民休息不煩而理歲庚戌大旱南川尤甚際熙遍歷各鄉撫慰力請蠲賑又詳請府大有倉並本縣倉米四千五百餘

石按戶給發民頌德焉越二年告休去士民立像私祀之

屠嘉正字時若浙江進士雍正十三年知大同府事勤勸課崇學校禁差派以清靜爲治吏民安之越二載陞福建按察司副使去民爲之歌曰農狎其野賈安其肆清靜寧一從公以治恒山蒼蒼桑乾洋洋維公之德容保無疆型仁講讓敦詩說禮多士奮興我公色喜昔有文翁庸蜀同風懷我公兮教思無窮

張聖夫湖北漢陽人乾隆七年以舉人任山陰知縣時積弊釐剔上下肅飭聖夫謹持其後安靜以養之於是閭

里清泰不知有吏訟至立判以去胥役玩法雖小必懲禁游惰捕豪猾於寬和中時一振厲民愛以畏焉

李歲直隸樂亭人乾隆十年以舉人任山陰知縣歲旱民乏食歲力請修築城垣以工代賑乃親董役事散值均給不假吏役手且時優犒資民不知災

張坊號湘帆湖南湘潭人雍正乙卯拔貢乾隆十四年任天鎮知縣縣南八里河暴漲北下衝嚙爲城患乃親詣相度高下開渠二名百丈河導水使東入南洋河隨於故道築隄疊堰以捍之遂安流如故創書院修邑乘構藏冰室建霜神雹神祠皆以經術潤飾吏治在任五年

調繁曲沃去

方恭愈浙江人乾隆十五年以選貢知山陰縣持躬清介自奉泊如建書院葺聖廟文學振興在任四年去之日囊無餘貲士民送者爭饋贖卒謝不受

嘉祥號芝亭鑲藍旗人由筆帖式累陞戶部郎中出爲汾州知府乾隆二十五年調知大同府歲屢荒歉繼以疾疫給棹斂死者復設廠煮粥以賑大有倉米石每歲春借秋還嚴飭胥吏平準其出入且予免息任輦者率裹贏餘以去歡聲載路雲中書院久廢爲營署乃度府治西隙地鳩工重建歲率屬捐俸爲膏火費又時親詣講

堂進諸生而董勸之士風蒸蒸然起二十八年大計以賢能薦卓薦移守太原大同人士至今誦述弗衰

朱宗洛字紹川江蘇無錫人性耿介坦白精於易理乾隆三十三年以進士銓授天鎮知縣甫下車卽懸賞緝獲廣昌縣越獄精匪窮治窩黨境內肅然凡聽訟不踰三日悉論報可息者令自和解皆感泣愧悔去公餘引諸生入署課之令執弟子禮士習丕懋庚寅分校省闈所拔多知名士明年四月卒於官篋中僅存所著周易觀玩篇及手抄書數十卷士民環署涕泣與前令陳並立像私祀焉

新修縣志

元漢天于林春煖十卷士刃...  
 外多收各七則...  
 北人...  
 日...  
 三十三...  
 水...  
 大同...

大同府志卷之十八終

風... 大同...

